

शुद्ध



रणजित बसुमतारी

शुंग्रि
रणजित बसुमतारी

THUNGURI :

A collection of poem written by Sri Ranjit Basumatary, Bikrampur, Bengtol, Dist. Chirang BTR, and published by Chirang Publication Board, Kajalgaon, Chirang District.

गिबि दिहुननाय : 2025 जानुवारी ।

मोनथाइ : लिरगिरि।

बेसेन : 250/-

बिखं : जोनोमजित ब्रह्म

Layout : Sorboshi Basumatary

Printed at : **OASIS OFFSET PRINTERS**

Chapaguri-1, Chapaguri, Chirang, BTR (Assam)

Email : oasischirang@gmail.com

Ph.: 9435020367

बरलेण्ड
सोमावसारनायनि
आगोमा
मुंख्लंफोरनि
मुडाव
बाउबाय ।

रणजित बसुमतारी

रायफोदनाय

गेदेमा खन्थाइगिरि रणजित बसुमतारी सारनि गिबि खन्थाइ बिजाब 'थुंग्रि'आ गांसे गोजौ थाखोनि खन्थाइ बिजाब। गिबिथाराव सारनिसिम गाहाम हामलायनाय हरग्रोबाय आरो लोगोसे आंखौ खन्थाइफोरखौ फरायनो खाबु होनायनि थाखाय गोबांथार हामबाय होयो। खन्थाइफोरखौ फरायनानै जोबोद गोजोत्राय मोनदों। बिथानि खन्थाइ बिजाबाव गासै दों स्निजिसे खन्थाइफोर दं। बिथानि खन्थाइफोराव मिस्टिक, रमान्तिक, हारि जौगाहो, हारि फोसाबनो, हारिनि थामोन्थानि आरो उनगोदान मुगानि खन्थाइनि सानस्त्रिफोरखौ रोखा रोखा बेरखांनाय नुनो मोनो। बिथाड बर' हारिनि सासे हारि सिबिसुला आरो हारिनि गेदेमा दैदेनगिरि सुबुं। बेनिखायनो बिथानि खन्थाइफोराव बर' हारिनि राव, थुनलाइ, हारिमु आरो माहारियारिबाद बाथ्रा आरो बेफोरखौ मुलुग दरबाराव लांनो नाजानायखौ नुनो मोनो। सम आरो थासारिजों गोरोबनाय गोथौ सानस्त्रिनि गोबां खन्थाइफोर बिजाबाव मोनो। बिथानि खन्थाइफोराव हारिनि थामोन्थाय आरो माहारियारिबादनि बाथ्राफोराबो स्ना स्नायै बेरखांनाय नुनो मोनो। बिमा माहारि एबा आइजोफोरनि सांग्रांथि, आइजो सोलोंथाइ, आइजोफोरखौ गावनो गाव गोखों (Empower) खालामनाय बाइदि बाइदि बिथिंफोरखौ लानानै थुलुंगाखां होनाय गोबां खन्थाइफोरबो बे खन्थाइ बिजाबाव दं। बिथाड बर' हारिनि गेदेमा दैदेनगिरिफोरनि मावनाय, बोसोन आरो बुंथिफोरनि बिदिन्थि होनानै गोथौ सानस्त्रिनि खन्थाइ सोरजिनायखौबो नुनो मोनो।

खन्थाइगिरि बिथाड गोबाव समनिफ्रायनो हारिखौ जौगाहो, आरो हारिनि उदांस्त्रिनि थाखाय थै-थां, मेंनाय-बानाय गैयाजासे गोबां खस्थ खालामनानै हाबा मावबोदों। जानो हागौ बेनिनो बिदिन्थि महरै 'आं बिग्रायारि' खन्थाइनि जोनोम। बर' हारिनि थामोन्थायनि थाखाय बिग्रायारि महरै हारिखौ नासयनाय, गादबनाय आरो सोबखनायनि हेंथायै जुजिनांनायनि बाथ्राया खन्थाइयाव रोखायै बेरखांदों। हारिनि थामोन्थायनि

थाखाय जुजिनायाव सुथुरनि आयुखौ थुंगेहोनो थाखाय गोनां जायोब्ला गुबुन गोनांथिफोर हेफाजाब लानानैब्लाबो जुजिनो ओंखारदों । जेरै बायदि अर्जुननि जिलिरनि बान— अग्नि, बरुन आरो बायु बानफोर बायदि राव, थुनलाइ आरो हारिमुनि हेफाजाबै हारिनि मोन्थायखौ मोनहोनो आरो जौगाहोनो नाजानायखौ बिथांनि खन्थाइयाव बेरखांनाय नुनो मोनो । बेनिनो बिदिन्थि बायदियै ‘आं बिग्रायारि’ खन्थाइयाव ओरै फोरमायदों—

“आंनावबो दं अर्जुननि जिलिरनि बान— अग्नि, बरुन आरो बायु बेफोर मोनफा मोनफा जिलिर थुंगेहोनाय सुथुरनि आयु आइनि रैसुमै राव, हारिमु आरो थुनलाइयानो आंनि जिलिरनि बान थामहिनबा—

सानदों नों सासे लोरबां बर’सा

नेनानै था, होनो थियारि फिन्नायखौ आंबो सासे दावहारुसोखा ।”

(आं बिग्रायारि, बिलाइ- 1)

खन्थाइगिरि बिथाड सासे हारि मोजां मोनग्रा आरो हारिनि थाखाय हाबा मावग्रा सुबुं । बिथाड गावनि मेंनाय बानाय आरो गासैखौ नागारनानै हारि सिबिनो आवगायलांदोंमोन । बेनिनो बिदिन्थि बायदियै बिथांनि ‘दाबुं आं मेंबाय’ खन्थाइयाव गावजों लोगोसे बर’ हारिनि सुबुंफोरखौ बर’ हारिनि आरो बर’ बिमानि थाखाय सोरजिनो सनानि बर’ नखर आरो बर’ हारिखौ गोदान फिरिनि मुलुग दानो मेंनाय बानाय गासैखौबो नागारनानै जारिमिननि गेदेमा जोहोलावफोर दैमालु सिखनानि बोर लानानै आवगायलांनो खावलायदों । बेखौनो खन्थाइनि रावै ओरै फोरमायदों—

“दाबुं आं मेंबाय

दाबोरसेनि थाखायबो दाफावसाय

नों जोहोलाव गोदान फिरिनि

दं नोंनाव बीर दैमालु सिखनानि

बोखांनो माहारि बेनो थि समाय ।”

(दाबुं आं मेंबाय, बिलाइ- 6)

बिथानिनो 'आबैनि बोसोन' खन्थाइयाबो बेसेन गोसा बोसोन खन्थाइ। बे खन्थाइनि गेजेरजों बिथाड दओरोडरि बर' समाजनि सुबुं फोथायनायाव हाबसन्नानै थानाय बेसेन गोसा ओंथिफोरा जोंनि सानफ्रोमबोनि जीउ खानायाव आरो हारिखौ रैखा खालामनायाव गोबाडैनो मदद होयो बेखौ रोखायै फोरमायलांदों। दोरोडरि खायफा खायफा सुबुं फोथायनायफोरा जोंखौ फैबाय थानाय समनि खायसे खैफोदनि इसारा होयो आरो बेफोरखौ मानिनानै सोलियोब्ला समाजा आब्रुथिजों सोलिनो हायो। बेखौनो 'आबैनि बोसोन' खन्थाइयाव ओरै फोरमायदों-

“नै खोनासं—

नोंसोरनि सान्नायाथ' हारसा ससे बांगाल ससे

दाबुं बिसोरनि बोसोनखौ गुबुन मुंसे

दालाय मानोथो गाबनांदों बिबायना मायरं खेन्दासे ?

जानाडखै होनलाय हांप्ला-सिफ्ला गैजायैखाय मुवा मोनसे ? ?”

(आबैनि बोसोन, बिलाइ- 19)

उनगोदान मुगानि खन्थाइनि सानस्त्रिफोराबो बिथानि खन्थाइफोराव बेरखांदों। बिथानि बारलानाय बुब्लि, देग्लायनि बैसागुआवनो दुमफेरे-रे बाइदि बाइदि खन्थाइफोराव गोदान मुगानि सानस्त्रि आरो सानबोलावरि खोथा बेरखानायखौ नुनो मोनो। रावखौबो गिनाय गैयै दोरोडरि हारिनि आब्रुथिखौ हेव खालामनानै सा साज्रां गोसोजों गावसोरनि गांनाय उखैनायखौ गिनाय गैयाजासे सुफुंनो नाजानाय आरो गोदान मुगानि आयजें आयलाफोरखौ मोजां हाबायाव बाहायैखौ नुनानै खन्थाइनि गेजेरजों थागिदा होनायखौबो नुनो मोनो। बेखौनो खन्थाइनि रावै ओरै फोरमायदों—

“थु लोगोफोर हमहैनो गुमा गोथाव

बै नुहुरनायानो जोंनि धाबा

थोर, बुंप्लांगारबायसो।

गाखोयो आं I-20

हिनजावा आंना 420,

दं नआव गोसोम थफ्ला

नामलां-गेलेमपुआव दुमप्ला-दुमप्ला;
रावबो रावनोबो दाबुं दे।”

(बारलांनाय बुब्लि, बिलाइ- 25)

बिथांनि खन्थाइ बिजाबाव आइजोफोरनि रैखाथि, जौगानाय, गावखौ गोख्रों खालामनाय, आइजो गोहो, आइजो सोलोंथाइ, आइजोफोरनो मान होनाय बाइदि सानस्त्रिफोर बेरखांनाय खन्थाइफोर मोनो। बर’ आइजोफोरा गुबुन हारिनि आइजोफोरनि उन नड्ड बेखौ खन्थाइनि गेजेरजों थुलुंगा होनाय आरो खायसेयाव गाज्जि लामाजों आगान सुरनो नाजानायखौ दिथा होनाय रावफोरखौबो बिथांनि खन्थाइफोराव नुनो मोनो। हारि मोनसेया जौगानोब्ला हौवा हिनजावनि फाराग लाखियाजासे जयै जौगानायनि हाबाफोरखौ मावलाडेब्ला हारिया जौगायो। बिथांनि खन्थाइयाव बेफोर बायदि फाराग लाखियाजासे जौगानायनि खामानि मावलांनो खावलायनायखौ नुनो मोनो। बर’ आइजोफोरा गोदोनि जारिमिननि समनिफ्रायनो हौवाफोरनि उन नड्डमोन आरो समानैनो खामानि मावनो हायो बेखौ थुलुंगाखां होनाय सानस्त्रि बेरखांनाय खन्थाइयाव नुनो मोनो। बिथांनि ‘आइजो गोहो’ खन्थाइयाव बेफोर सानस्त्रिया रोखायै बेरखांदों। बेखौनो खन्थाइनि रावै ओरै फोरमायदों—

“नै माल’थि नै रैमालि थाखो मानो सिरि सिरि
आइजो होनना खोमाना दाला गेजेन नड्ड जों हौवाफोरनि
गेजेन जोंनि हिट्लार-नेपलियन, गान्धी-मुसल्लिनि
सम थानायावनो हमनांगोन थुंग्रि नुमलि बिरगोस्त्रिनि
सोर बुडो जों नेहाद न’ इसिंनि ननेमा
दावहा थिलियाव थांब्लासो सिनायगोन थारैनो जोंसो हाजोमा।”

(आइजो गोहो, बिलाइ-31)

बे खन्थाइ बिजाबाव जायगा मोन्नाय गेदेमा खन्थाइगिरि बिथांनि खन्थाइफोरनि सानस्त्रि, देंखो आरो खन्थाइयारि आदबफोरा गुबुन गुबुनब्लाबो दोंफा दोंनै खन्थाइनि सानस्त्रिफोरा एफा एनै गोरोबज्जलायनायखौ नुनो मोनो। खन्थाइयाव बाहायनाय सोदोब, बाथ्रा फान्दाय आरो बाथ्रा

फावफोरा खन्थाइफोरखौ जोबोद दोलगोनां खालामदों। आरोबाव
जारिमिनारि आरो सलन्थाइमायारि आखुथाइफोरनि मुंफोरखौ नेरसोन
महरै बाहायफानानै थुलुंगाखां होनाया खन्थाइनि समायनाखौ बांहोसिनदों
आरो बिदै बरहासिन खालामदों। बिथानि बे खन्थाइ बिजाबा बर'
थुनलाइनि बाख्रिखौ आबुं खालामनायाव हेफाजाब होगोन। मिजिंथियो
बिथानिफ्राय फैबायथानाय समाव आरोबाव गोबां खन्थाइ बिजाबफोर
मोनबावगोन होत्रानै।

ड० मल्लिका बसुमतारी

20-11-2024

आंनि फनैसो

गोरबोनि मोन्दांस' हायै मिजिंजों थुंगेरोडै बिथिडव दावहा नाडै नाडै मोक्थाडारि जीउनि दाहाखौ आंनि बे गिबि खन्थाइ बिजाब 'थुंग्रि' नि गेजेरजों फोरमायनो नाजाबाय । खन्थाइनि गुदि-खिथा मोन्थि रोडब्लाबो गोरबोनि रावखौ खन्थाइनि गेजेरजों फोरमायनो गाहाम मोनो; बिनिखायनो बे खन्थाइ बिजाबखौ माहारियारिबादखौ फोथांना लाखिनायनि गुदि हमनानै थुनलाइ सिबियारि रायजो राजाफोरनि आखाइयाव गथायना होनाय जाबाय ।

आंनि बे थुंग्रि खन्थाइ बिजाबखौ आबुं महर होनायाव सोदोब आरो हांखो दाजाबफोरखौ नायबिजिरना होनायजों लोगोसे थुनलाइ सिबिनायाव थुलुंगानायनि थाखाय मानाव गेदेर ड० मल्लिका बसुमतारी बिथानिसिम आंनि गोरबोनि जोबनो गैयै हामब्लायथि थाबाय ।

रणजित बसुमतारी

बेंतल, चिरां

बिटिआर

फारिलाइ

1	आं बिग्रायारि	1
2	बेमफोर	2
3	सोर नों	3
4	मोनसे मोनदांथि	4
5	दाबुं आं मेंबाय	6
6	गोदान नबथि	7
7	तापसि फिथाइ	8
8	अनसुलि आइ	9
9	खौसेनि देंखो	11
10	फेरेंगा दाव	13
11	दावबायारि	14
12	सुबुंथि	15
13	फोथायथि	16
14	मुंख्लं	17
15	आइ बैसोमुथि	18
16	आबैनि बोसोन	19
17	बड'फा	20
18	बुरलुंबुथुर	21
19	खन्थाइगिरि	22
20	बिनानावनि हिसानसालि	23
21	गांसे लाइजाम	24
22	बारलानाय बुब्लि	25

फारिलाइ

23	बिबेकनि दावहा	27
24	आं आइजो	28
25	बिनानावनि बानजायनाय	29
26	आइजो गोहो	31
27	आंनि मिजिं	32
28	आंनो थरथिंसे दै नांगौ (मुगानि साखि)	34
29	रौरोथोन	36
30	अन्नायनि आबिर	37
31	बडंसा आं जगतगुरु	38
32	नखर दावहा	41
33	आं	43
34	दलिल	45
35	बालन्दि दावब'	46
36	अनसुलि बिमा	47
37	खन्थाइगिरिनि सिनायथि	49
38	सोरजिथाइ आरो सोरजिगिरि	51
39	देग्लाय बैसागुआवनो दुमफेरे-रे	52
40	आइनि फोरोंखान्थि	54
41	फागुन दाननि जौमोन बुब्लि	56
42	बाना	58
43	माहारियारिबाद	60
44	देरहासारनायनि फिरफिला	62

फारिलाइ

45	मेंरोडैः फाइखि (प्रमद बरखौ गोसोखांना)	63
46	दाहा	65
47	फागुननि आबिर	67
48	सदबांसा	69
49	दाइया सोरनि	70
50	गोसोनि दावहा	72
51	बुब्लिनि दावहा	74
52	बाजै सरला (गांसे लाइजाम)	76
53	थां आरो थांनो हो (बडफाखौ गोसोखांनानै)	76
54	गेदेमानि मांखरसालि (मोजोमसे बिबार ब्रजेन्द्र कुमार ब्रह्मनो)	79
55	गेदेमाफोरखौ संदान्नानै	81
56	गोदान गामि	83
57	अर	84
58	आं बर' गोदान मुगानि	86
59	आं फावखुंगुर, दिन्थिगासे फावथिनानि	88
60	आं बर'लेण्डनि दैमा	89
61	आंनि आफा	90
62	आंनि हाबिला	91
63	जीउनि मिजिं	92

फारिलाइ

64	आरज	94
65	आं चित्रलेखामोनथाय	95
66	सानस्रि	96
67	थुंग्रि	98
68	गनै आगजु	100
69	बरनि अख्रानि हाथरखि	101
70	सिखांदो गेदेमा	103
71	लाइमोन बुब्लिनि गेलेनाय	104



आं बिग्रायारि

आं बिग्रायारि
नछ उदखारि नों बूनायबादि
थांखिया मोनसेल' थामोनथानि,
अदेबानि—
उदखारिया बिसो
जाय नासयो, गादबो आरो सोबखयो गुबुननि ।

सोरनिबा होगदावनायाव आं बागदावा
मेगननि जाहाबनायाबो आंनि अस्त्रखौ जानगारहोनो हाया
थांखिया मोनसेल' थामोनथानि,
बबेखानि—
साननो हागौ नोंनि बिमाया बयनिखुइबो आंगोसिन
जुदिय'ब्लाबो नोजोराव आंनि आइया गाजिसिन ।

आंनावबो दं अरजुननि जिलिरनि बान— अग्नि, बरुन आरो बायु
बेफोर मोनफा मोनफा जिलिर थुंगेहोनाय सुथुरनि आयु
आइनि रैसुमै राव, हारिमु आरो थुनलाइयानो आंनि जिलिरनि बान
थामहिनबा—
सानदोंबा नों आं सासे लोरबां बर'सा
नेनानै था, होनो थियारि फिन्नायखौ आंबो सासे दावहारुसोखा । □

बेमफोर

बारा गोब्राबैनो बारथारदों
बारहुंखा नड नाथाय सिमब्रेलायदों
जेथिं बारलांदों न'-बां बिफां लाइफां बायफ्लेजोबलांदों
सिबाय आगोमा दावसिन दावलाफोर
दाइनां सुजिनां गासिबखौबो खोमानांदों ।

सोरांबाय ना सोराडखै जाखो
दावलायाबो गेसेराखिसै माथो
एफाग्राब खोमसि हादोरसि बिदोरसि
खोनायोबोल' फेसानि मेउ मेउ सोदोब
गोजांस्त्रिव स्त्रिव गिसि गिसि ।

नै बिमा— मादै, आलायस्त्रियाथ' फिसाजो सावख्लियाबो न'आव गैया
गेग्रेब ग्रेब देरायाबो अबस्था गैया
सिबाय आयं नाग्रिआबा माबादि थासारियाव दं
जोंमालाय बोरै थांलायखो सोरनिबा खाथियाव
खदै मननानैनो थानाडो लक्ष्मन रेखानि सिडव ।

जिबनि जीउ बेमफोरबादि बेसेनगैयै बेसाद
सान हाबनायनि उनाव मिजिंथिनोनो हाया सान गोरलै
सोंलु बेरखांफैयो गोरबो इसिडव
आफा इसोर फैफिनबावदो खेबसेबाव बे संसाराव
सैथो, नियाइ, अत्राय आरो सुबुंथिआ नुजासारथोंसै मोगथाडारि महराव । □

सोर नों

दुफावलु जोमैयाव थाखोमा थाखोमा
सुखुनि समावल' नुजाफैयो हुरा हुरा
सिमां मोगथां जाना साया माया
सोर जाखो नों सिनायथि मानो लाया ।

आजै आजौब्ला नों जौनि फोलेरनि
खालामफै हेफाजाब अलखद समाव
थुलुंगाफै आंखौ दावहानि बे बुब्लियाव
गोनाथि नौनि हरि रैखाथिनि ।

सुथुरसो नामा नौलाय ?
मिनिखैरो-रो खालामो आंखौ बरायनो
हायना सारफ्रावना जुलि लानो
सानदों नामा आंखौ एचिमलेशन खालामनो ?

सुथुरब्ला नों खोनासं फंसे राव
माब्लाबाबो दासान आं गोदाव सोराव
आंबो सासे आइजो गोदान मुगानि
हानाय नड खालामनो आंखौ आनि थानि
नुम'लि, बिरगोस्त्रि आरो रोनसुनद्रिनि थै थासानदि ।

आंगोब्ला नों आंजों नुजाफै
गेलेनो दासान आमै जिमै
नुवाखै बोहैदों जेथिंबो मुंख्हांनि थै
हारिनि अलखदावबो लाजि मानो रोडखै ।

गोहो गोलोन्दांब्ला स्त्रि स्त्राय था
गुबुननि मावनायाव दाहो हेंथा
नडब्ला जोबस्त्रांगोन बर' हरिया
फैमाल जागोन नौनि रुजु रुमु रायजो जानो साननाया । □

मोनसे मोनदांथि

आंनि सिगाडव साथाम आइजो
बिमा, बिनानाव आरो बिसि ।
आइनि रावआ मिलौदो मेहेर गोनां
खौवौनिखुइबो मिलौदोसिन,
गोरबोआ बेसेबांबा गुवार आरो गोथौ
लैथो-लैथोमानिखुइबो अरसिन एबा थौसिन ।
जेब्लासिम आइनि गोरबो बिखायाव आं उन्दुगोन आलो आलो
जल, बायु, अग्नि आरो सनिआबो हाया आनिथानि खालामनो,
बिनि अन्नाय आरो आसिरबादआ दंनायसिमाव
अन्याइ, हिंसा, दुथां आरो अहंखाराबो हाथारखाया फेजेत्रो ।
बिनानावा आंनि अन्नायनि प्रतिक
मिजि मिजि आसिजों बिलिरनाय दानाय आरनाइया
महिमाजों साथिफबनाय देरहासादनि प्रतिक;
बिनि दाव दाव अन्नायाव आं मेंगायो
खस्थ, दुखु आरो सैनांनाय गासैखौबो बावगारो
बेरखाफैयो बिरगोस्त्रि, गामबारि आरो नोलमुनिनि सावगारि ।
बिसिनि आखुथाइया दिदोमथिनि नेरसोन
फिसाइनि मोनफ्रोम साया-माया दावहानि साखि
सुखु-दुखु, गाबनाय-मिनिनायनि भागि
दाखांनाय, लुखांनाय आरो जौगाखांनायनि फाइखि
फिसाइनि मान, मर्जदा आरो सम्फथिनि बाखि ।
नाथाय—

गुबुन गुबुन समाव नॉनि सिनायथिआ आलादा आलादा
सोरबा गाबज्रियो नॉनो सिता,
सोरनिबा नोजोराव मरियम;
माखासेनि नोजोरावलाय नॉ अनसुलि सुभद्रा
माब्लाबा सिनायथियो गानना थावसि दखना
बेसेबांदि सोमोनांथाव नॉनि महिमाया
बिमा, बिनानाव, बिसि जाना समाज दाखांनाया। □

दाबुं आं मेंबाय

दाबुं आं मेंबाय
दाबोरसेनि थाखायबो दाफावसाय,
नों जोहोलाव गोदान फिरिनि
दं नोंनाव बीर दैमालु सिखनानि
बोखांनो माहारि बेनो थि समाय ।

सौखलबाय सिगुना फानजामुथि बर'नि
गाथेबाय गोदना धदड आइनि,
रिंखांदों जेथिंबो दुखुनिल' देंखो
सोरथो दंबावो बर'खौ बोजबनो
नोंनोथ' सासे दाखांगिरि बर'नि ।

नांगौ जोंनो सासे जांगिला जोहोलाव
नोंबादि दावहारु बर'नि गेजेराव,
लुफावथों बियो अमृत इउन जोलैनो
लाबोथों दरलबसे नबथि अरायनि आइनो;
दे सना—
सोरजिना गालानि गंसे सनानि बर' नखर
गोदान फिरिनि मुलुग बिखायाव । □

गोदान नबथि

मिनिग्लाबदों दावखा दन्दा नायना सोरलिल्लिं गाननाय आईनि
सै सै आइथिंजों आखाइजों नासयजानाय लोरगेंगें देहा आफानि
बाथौसालि थानसालि जाजोब्बाय गुबुननि बोरमासालि
थेवबो मानो जाखो निजोम गेदेमा नुनानै ख्रैफोद बरंनि ?
नोंनो बिबुंगोरामोन ख्रौसेथि दोहौनि
जावरिखांहोदोंमोन माहारि गंसे उदां नखर दानायनि
सा-ससेयावनो खालामबाय थेर-बेथेर मिजिं गेरेमसा हारि दानायनि
मानोथो इसेबो सानाखिसै जानानाय खदैजों-मोदैजों बरंनि ?
दहाय गेदेमा—
खुथाब खावलायो फैफिन नों दाबो
दाइ-दस नागारलायना ख्रौसेथिनि देंखो सुजुनो
बर' बिमानि मुडव गंसे गोदान बाथौसालि लुखांफिन्नो । □

तापसि फिथाइ

जोहोलाव—

दाबोनो नों गावनि तापसि फिथाइखौ सिनाय रोडखै ?
बेथ' नोंजोंनो दं साया-माया
नोंनि सोलेरजोंनो थांफा-फैफा
माब्लाबा उन आरो सिगां जाना ।

जुदियब्लाबो गोमोरलांगोन हानि देहा मोनसे समाव
अमर जानानै थालांगोन मुलुग बिखायाव,
फिरि फिरि बाग्लायलांगोन बुब्लि गावनि बिथिडाव
थेवबो थालांगोन बे लिरजाना जारिमिन बिखायाव ।

तापसि फिथाइनि गुबुन मोनसे मुडा साहस आरो दिदोमथि
नोंनोथ' सासे बिगोमा बे मोननैन,
बाहायथारनांगौल' बिखौ खाबु नाइयै नाइयै
मानोना—

बे जामरोड, जिरोड आरो माब्लाबाबो जानगारा ।

नै जोहोलाव, फोजादो उन्दुस्त्रिनाय नोंनि तापसि फिथाइ
स्लद बखना ज्राब गारहरदो खसाब जिफ्लेनाय,
दाबुंथारसै अन्नानै बेफोर अबनि गेलेनाय
गासिबो सोनारो तापसि फिथाइयावनो हारिनि थैनाय थांनाय । □

अनसुलि आइ

नों मानो एफाग्राब अनसुलि आयै
खाड मानो सिख्लाय अरसै अरसै
खबसे ओंखामखौनो खालामना खबनै ?

जानांगौमोन नों राक्षसिसो
अन्थाइबिखा, फिसानि थै लोंग्रासो
दानुथारथोंमोन आं दिनै दुखुथिया बर'नि हालोदखौ ।

नोंनि थाइनै आहारनि गुनासो मोननै नामा
बिनिखायनो जोनोम जाबाय हथ'सिराफोर सुमेरु-खुमेरु
इनाय, अनागार आरो मुगैलायनायनिल' गुरु ?

गोरोन्थिया सोरनि—
जोनोमगिरि ना आं ?
जाउना सैथो ना असैथोनि ?
ना उनदाहा बै बुब्लिनि ?

उस—
दासो उनदाहा जाना मा जाबावनो
खानाय बोसाब बोसाब गाबना मा मोननो
बिसोरथ' आहार नागारनाय मिफोरबादिसो;
मेगन गोवनायसिम नोंनि बिखायाव उफ्ले उफ्ले

आइथिं राना खालामबाय नोंखौ अरफले उरफले
दाहास्थायसै आयै रावनिफ्रायबो मायरं खेन्दासे ।

अब्लाबो, खेबसे खावलायबावबाय आयै
हायोब्ला बुथुमदो खेबसेबाव फैथोंसै खौसेयै
नोंनि दैदेन्नायावनो मोखां नायज्जायज्जाय लावखार ओंखाम जाथोंसै । □

खौसेनि देखो

जों बबे मुलुगाव दं,
मोगथाडारि ना सानबोलावरि ?
खोनादोंमोन सल' दैमालु सिखना जोहोलावनि
खोमोन गसंख्रांलायनाय जीउ जारिमिन बिसोरनि,
नाथाय—
जोबस्रांनाया बिसोरनि नासयलायनाय आरो नासयलायनायनि ।

दाबुं मोन्दांथि गैयै दैमालुनि सल'
लिरगिरिनि बे मोनसे सानबोलावरिल';
जोंथ' मोगथाडारि मुलुगनि गोदान फिरि
मानोथो गोरोबफ्लेदों अब्लालाय सानबोलावरिजों सिरि सिरि ?

खोमानांबाय गेदेमाफोर हायैनि नाजावलायनो
फोजोबलायबाय आंगोफोर हायैनि बावगारलायनो
सानबेसे दावबायबावनो बिब्दि थासारिजों
अहंखार गुरगुजिया जाना गाव-गावजों ?

रोडब्ला नों गावनो खामफ्लाय दाननो
माखौ लानानैथो अहंखार जाखो,
खामफ्लायनि बेसेनखौ रोडब्ला होनो
दासान जुगामि जिरायबाय थानो ।

जानांगोन जों मोगथाडारि
सं दानना फुंखा सानबोलावरि

दैदेनगिरिब्लाबो बयबो बाइदि आफादनि
थांखियाथ' मोनसेयानो बर' हारिनि ।

फैदो-फै बयबो खौसे जादोनि
सिरिबाडै आइनि सिगाडव सदबांसा लादोनि;
रोजाबदिनि जयै— बर' हारिनि जै
हज्रिखावनि फै— बर' बिमानि जै । □

फेरेंगा दाव

फेरेंगा दाव
खोमसिखौ बिदाय होनाय
सोरांखौ बरायनाय
सोमोनांथाव बे नॉनि आखुथाइ
बेनिखायनो राजा नों दावनि मुलुगाव ।

थेदसौ-थेद थेदसौ-थेद गाबनायाव नॉनि
सिरि मोनो दावमा दावसा मुलुग बिखानि
जान्जि खाफ्रायो बयबो साखाफारा इउन जीउ खांनायनि
नोजोरा मोनसेल'— थांखिखौ जाफुंहोनायनि ।

नॉनि फोजाखांनायजों रंजाखाडो मिथिंगा बिमायाबो
दान्दिसेयावनो आबिर गाबगायो मुलुग बिखायाबो
रिंखाडो जेथिंबो खुसि आरो खुसिल'
मुंबो दाहा गैया नामा नुयो रंजानायल' ।

हाबाब आफा अबंलावरि
थानायमोनब्ला बर'हाबो राजा फेरेंगा बादि सासे दैदेनगिरि
उन्दुस्त्रिनाय माहारिनि गेदेमा दैदेनगिरि
खोमसिखौ संहारना सोरांनि दिन्थिगिरि
बेसेबांदि खुसि जागौमोन दुखुथिया जों बर' हारि ।

नाथाय,
जाफुंमारगोनदा हरमालाय इसोरा बिब्दि
हनै माथो बयबो गावजों गावनो एना-एनि
माब्लाबाबो सोरांमारनाय नंलियाखोमा दावमा-दावसाफोर बादि । □

दावबायारि

नै दावबायारि
खोनासंदो आंनि फंसे राव
लांफादो अन्नानै गंसे लोरगि
आबौवा थिनानै दोनखादों अग्दाब सायाव ।

बारहुंखा फैगोन लामा ससेयाव
फैलासेम बुसोमगोन
खस्थ सैनांगोन सा-ससेयाव
गोरोन्थिनि उनदाहा जानांगोन
दान्दिसे जिरायलां आंनि गेग्रेब देरायाव ।

वेचिचमोनब्ला आं साहारा बालाहामानि
सुग्लाय होगौमोन नॉनि मेंरु-रु देहाखौ
देंखोगिरिमोनब्ला आं खौवौ बादि
रोजाबगौमोन मिलौदो गारांजों थुलुंगानो नोंखौ
लॉलांफै जोहोलाव लथासे दै जोंहानि दैखरनि ।

थांखिया नॉनि बै नुहरसयै मिजिं
समायखिरा होदोंमोन बर' बिमानो
रोजा जेंनानि गेजेरजों सिगांलांनो नैबे बिथिं
गावनि गासैबो खोमानाझथों मानो
फैदो जोहोलाव, सुस्नाना लाफैदो सोलेरनि गोलोमदै । □

सुबुंथि

सुबुंथि

आं फंसे बाथ्रा सोनि

धोरोम बिजाबा बुडे अनलायनाया सोरगोआरि ?

आं खोनानो मोन्दें

सुबुड अन्नायखौबो बोखावदों—

गोरबोनि अन्नाय आरो सोलेरनि अन्नाय,

जाम्बि जाम्बि आंसो अन्नायजोंनो गाब्रनांदें ।

जायनो आं अन्नायखौ होदोंमोन

बे गोथार आरो सोरगोआरिमोन,

अख्रानिखुइबो गुवार आरो लैथोनिखुइबो थौसिनमोन;

नाथाय,

दान्दिसे नुज्जायैनि दाहाया जेसेबां

नागारजानायनि दुखुआ बेनिखुइ रासिन ।

सुबुंथि

आंलाय बेवहाय मानि दाइनिगिरि

अन्नाया गोथार आरो सोरगोआरिखायसो अन्नाय होदें;

सिनाय हायाखैमोन बै मैखारिखौ

बिखायनो सोबख्लबाय बिखा बिख्लोखौ

जानो हागौ गोसो दबथायनो हायैआनो आंनि गोरोन्थि ।

मोनसे खावलायनाय सुबुंथि

जानांबायब्लाबो आं सासे बाजारि

अन्नायनि मुडव जिनाहारि दाजानांथोंसै आइजो माहारि

सांग्रांथि लाबोदो नों—

अन्नाया थार आरो सोरगोआरि । □

फोथायथि

आयं अमासि,
सावजेन्नाय फिथाखौ बाउहर बारिनि खोला सोनाबजों
नडाब्ला गिदिंलांफिनगोन बिसोर दुखु-दाहाजों
आजै-आजौनि हुदाखौ दाखालाम हाथासि ।

आं बुजिस' हायाख्रैमोन
आर्यनि नोजोराव गोरोन्थि मावफ्लांबायमोन,
मोनजेन्नाय फिथाखौ बाउजेननायादि बर'नि सर'खामोन
गेसाव मोनामो होनना आबै-आबौवा बुंखादोंमोन ।

नाथाय,
बै मोनामनायावखि दं सैथोथि
बै मोनामनायाखि आजै-आजौनि ?

बोरै फोरमायबावनो आयं नोंनो
बेजे मोनामनाया नोंनि अनसुला फिसानिनो
नों नेनानै थानाय बै जोहोलाव
जायखौ खालामो नों दाव-दाव !

हाबाब गसाइ,
बेनो नामा नोंनि गेलेनाय;
खालाम होबाय नों जोंखौ दानलाय-सुलाय
जेथिंबो सेवबुं-बुं मोनामनाय आरो मोनामनाय
बोरै फोरमायबावगोन आं 'आयं बे नोंनि खाना फोथायनाय ।' □

मुंख्लं

मुंख्लंफोर

थामोन्थानि मोन्थाइ नागिरना

बिमा-बिफा बिब'-बिनानावखौ नागारना

बाउबाय जीउ बर' बिमानि मुडव

दावहा नाडै नाडै बिदिन्थानि फाखनाव !

मुंख्लंफोर

नोंसोर माबोरै दं ?

माब्लाबा हाथरखि जाना

आइराखि गराइयाव गाखोना

ग्रह नक्षत्रफोराव गिदिडै गिदिडै

नायहरफलायबाय थायो नडासै बर' फिसाफोरखौ ?

ना मोखां फांथे फांथे गाबखोमायो नुना जोनि आखुथाइखौ ?

नोंसोरलाय नुखादों जानांगौ

दुथांफोरा उन्दों सिखा नोंसोरनि आलाय-सिलाय हारायाव,

सुस्राना थैसाम आइनि मोदैजों;

उन उन खारफादों बिसोर सुथुरनि लिंखावनायाव

जेबो थांखि गैया फोजोबस्रानायल' गाव-गावजों ।

निमाहा गेदेमाफोर

अन्नानै साव दाहोसै जों दुखुथियाफोर

नोंसोर सावैब्ला नागारसिन्नाय नडा दुखुआ जोंखौ

सम जाब्ला उनदाहा खालामनांगोन बिसोर गाव-गावखौ । □

आइ बैसोमुथि

नोंनि गोरबो बिखायाव रजनाय बिफां-लाइफां
बार-दै, दैमा-दैसा आरो दावमा-दावसा
बेफोरनि मोन्थाइ गैया नामा जोंहा बैसोमुथि बिमा ?

नखर थासेयावबो सोंखारिजादों—
‘खिरात, असुर, दानब, म्लेच्छ’ नोंसोर
नबथि नागार नागार खारथिंबायदों हाजो खना खना बर’फोर
जाहोना मा ?
गादबदों, नासयदों आरो सोबखदों बिसोर ?

बिमा बैसोमुथि
नोंनि फिसाफोरानोथ’ फोरोंगिरिमोन सोबखगिरिफोरनि
सोलोंथाइ ज्यतिषि बिद्धा
बिनिखायनो मुंदांखामोन बर’नि हादोर प्रागज्यतिषपुर
मोसा जानानैबो जानांबाय दा सियालनि खाजा ।

सुथुरजों हेव मानियै
गुबुननि सिडव थाया होनना फैदोंमोन खारै खारै
मानोबा जानांखो दिनै मुस्त्रि सिंनि थाम्फै ?

बिमा जानाबो होयाब्ला फिसानि मोन्थाइखौ
मानोथो सोरजिया नों बर’ हारिखौ
बोरै सिनायथिबावनो जों बर’ होनना गावखौ ?
माथो दंबावो जोंहालाय गावनि होत्राय ? ?

आबुं सोदोमस्त्रिनि बिमा नों बैसोमुथि आइ
धोर्ज्यनि सिमनायावनो दं नेनानै नोंनि अत्राय
सानसे मोनजाथारगोन जों नोंनि थाइनै आहारनि फिथाइ । □

आबैनि बोसोन

आंनि गोसोआव दाबो जाखाँफैयो रोमै रोमै
आबैया आइखौ बुंनाय—
गथेफोरखौ खाद'जों दा दियाइ मोसा अरगोन;
आबौवा आफाखौ बुंनाय—
खाना दाखालाम संग्रायनि महरखौ मोसा बारसिनगोन ।

ब्रायैनो दियाइ जानायखाय खाद'जों
जाबाय जों बर' खिबुआव खर';
लायैखायनो बोसोन आबौनि फोरोंनाय
आगानफ्रोमबो गाब्रदों सानाय सुथुरनि सक्र ।

आबौनि रावआव मिनिदों आदाया
संग्राय हेबनायजोंखि मोसाहा सोमोन्दो थायो ?
आब'आ बुंदों आबैया जाम्बिसो
सोर खोनथाबायनाय खाद'जों दियाइब्ला मोसा अरनाय ?

नै खोनासं—
नोंसोरनि सान्नायाथ' हारसा ससे बांगाल ससे
दाबुं बिसोरनि बोसोनखौ गुबुन मुंसे
दालाय मानोथो गाबनांदों बिबायना मायरं खेन्दासे ?
जानाडाखै होनलाय हांप्ला-सिफ्ला गैजायैखाय मुवा मुंसे ??

जानोहागौ आबैया सिरि साखाग्रा
थाफिल माराम-राम आबौवा लेन्थि थेबग्रा;
नाथाय,
बिसोरनि बोसोना बाण गोनां
मोनफ्रोमबो मावदिन्थिया बेसेन गोनां । □

बड'फा

बड'फा

नों गायनाय बिफाड गोरोनथाय नांबाय
मावलिहां-हां समावनो रोमोलांबाय
मादायावसो गुनजेर अरबायनामाथाय !

नाथाय,

गोरोन्थिया सोरनि जाखो
हासार-दै होनो रोडाखै नामा आंसो
ना लुसोमबाय गुदुं दै बारदै सिख्लायासो ?

नडा नडा,

दाइनिगिरिआ आंसो
गेदेमाफोरनि बोसोनखौ लाबोफेराखै माब्लाबाबो,
बारदै सिख्लाखौ दुसिना मा जानो
बिसोरथ' थियारिखा गावसोरनि हाबाखौ मावनो
रोडाखै आंसो हारिनि इउनखौ साननो ।

अलसियाखायनो सोनारो आं गुबुननियाव
दिनैसिम उन्दुना दं नों गायनाय गेरेमसा बिफांनि सायख्लुमाव
सानफेरबोयाखै बेखौ फोगोमनो
दाव दाव खालामना गोरबोजों अनसायनो ।

उस,

दासो हमदांनो हाबाय आं
गावनि आथिडवनो खुबाय रुवा
नों गायनाय बिफाड रानज्रयलांब्ला
बबेयाव जिरायबावगोनथाय आं अबोला !! □

बुरलुंबुथुर

फैलाव हायेननि बिखाजों
बोहैलांदों निजोम बबा जानानै
अनजिमा गैयै थांखि लानानै
दान्दिसे थाथ'साय बुरलुंबुथुर
सानदोंमोन आं फंसे बाभ्रा खावलायनो होन्नानै ।
नोंनि धोरोमा गुबुनखौ सुंखनाय
गांहाबनाय जिबनो गोदान जीउ होनाय
गेसाव-गोफोन दाखोर-दाला सिबस्रांलांना
मिथिंगाखौ देलायस्रो महर होनाय !
नोंनि मावदिन्थियाव ओंखारफेराखै
मुगैनाय, हिंसा, गुरगुजिया आरो अहंखार आखुथाइ
नुदोंबोल' अन्नाय आरो अन्नाय;
हागोनना बरलुंबुथुर
खोनासंनो राव फंसेल' खावलायनाय ?
नायहरसाय अन्नानै—
आंगोफोरा जाजोब्बाय हिंसाखुरिया
सैमा जानायखौ मावजिया सैया
रावबो रावनिबो जौगानायखौ लुबैया;
हायोब्ला अनफ्लायदो बिसोरखौ
सुस्रांलांफादो—
गोरोन्थि आरो सानगोथे आखुथाइफोरखौ
हाथोंसै लुखांनो खौसेथिनि बान्दोखौ । □

खन्थाइगिरि

आंबो सान्दोंमोन दोंसे खन्थाइ रुजुनो
आंगोफोरजों ख्रौसेथिनि लो सुजुनो
आलारि बुब्बियाव आमाय-जिमाय गेलेनो;
नाथाय,
खन्थाइगिरिख्रौ रावबो फोथाइया
खन्थाइनि बेसेनख्रौबो रावबो होया
मुखुब बयबो गावबा-गाव आदा बुगाव ।
दासान खन्थाइगिरिख्रौ गाब गोनां
नड गोमो खन्थाइगिरि हिंसा गोनां
गोरबोजों आवरायब्लासो मोन्दांगोन बेसेबांदि सैथो गोनां;
उ...प... खन्थाइगिरि
जानांबाय नोंसो दाइनिगिरि
फोजाखांनायनि थाखाय दानब हारि !
खन्थाइगिरिहा धोरोम गैया
खृष्टान ब्रह्म बाथौबो नड
गिनाय फोलानाय मुगैनायबो गैया;
सिबाय, बिबोथ' सासे सुबुंसो
गांनाय उखैनायजों बुसोम जाग्रासो
हारिनि मुडव बेसेबां दाहा गारनो !
दाफावसाय खन्थाइगिरि मानिबा थाखाय
मावनांगौ दं गोबां हारिनि थाखाय
बेफोरथ' गासिब्बो गावनिनो मोन्थाइ;
नोंनि थोर थोर मावनाय आसिख्रौ खेर खेरायनाड
सोरनिबा होग्दावनायाव उनफिन नाड
नों सासे खन्थाइगिरि आमायथु बर' माहारिनि ! ◻

बिनानावनि हिसानसालि

बिनानाव, मानो सिखारखो हिसानसालिनिफ्राय ?
आंनो दिनैनो नांथारगौ, सान हाबनायनि सिगांनो
जान्जि खाफ्रानो नोंनि आरनाइ ।
नों जिरायब्ला बोरै जानो सना
आंनि थुलुंगानायाथ' नोंसो;
रोजा सुथुरनि खैसाराबो फेलें जायो
दावहानि सिगां नों अनसायब्लासो ।
दे बिनानाव दिनैनो दाख'
सोरनि सायावथो लामा नायनो;
थुंग्रिनि मारामखौ दानो हुख'
थास' बिफां बादि सुथुरखौ एवस्त्रांनो ।
नोंथ' फुंखा आंनि गासैनि
थसे बनजार अम्बासि हरनि;
जेना आं माब्लाबाबो नों थासेयाव
बाथौ बुरिनि बोर दं नोंनियाव ।
मोनथिगौ बिनानाव—
नोंनि आखाइया महिमा गोनां
नों दंब्लानो जायो गासिब्बो बोर गोनां;
थांदो सना हाबहैदो हिसानसालियाव
दान्दिसे उनाव थांनोसै आंबो दावहा थिलियाव । □

गांसे लाइजाम

अनसुला आदा,

नाजावदो खुलुमनाय नों बिनानावनि

हायाखैब्लाबो हरनो आरनाइ थांनाय बैसागुनि;

सम सम गाबो आइया गोसोखांना नों गैयैखौ

अब्लाबो दुबगाखाडे आदा लानानै नोंखौ ।

आंनि रंजानायाथ' सिमा गैयै

बिनानाव आं सासे जोहोलावनि मोनजायाखैब्लाबो नायै-बेदरै;

आदा,

जोंनि दुखुनि दाहा दाखालाम

नेनानै थागोन जों जानांब्लाबो ओंखाम गोखाम ।

बबेखानि,

जों सानैल' आइजोनि लोरबांथिखौ नुनानै

माखासे फलाना मैहुर खालामनो नागिरो गावसोरनि मुलाम्फानि थाखाय;

जुदियब्लाबो बिसोरनि नोजोरा जोंनि सोलेराव

दाखांदोल' गंसे उदां नखर मुलुग बिखायाव ।

दंब्लाबो लिरनो गोबांथार नोंनो

दोनबाय थफ्ला बोनना इउनाव फैब्ला होनो;

नाजावदो खुलुमनाय खेबसेबाव आंनि

अन्नानै रानना होदो लोगोफोर नोंनि

दावगालांबाय था नोंसोर थांखिया जाफुडागौमानि । □

बारलांनाय बुब्बिल

दिनैनि बोथोरा सोमो नांथाव
सैमा-सियालनि हाबा,
थु लोगोफोर हमहैनि गुमागोथाव
बै नुहरनायानो जॉनि धाबा;
थोर, बुंफ्लांबायसो ।
गाखोयो आं I-20
हिनजावा आंनि 420,
दं नआव गोसोम थफ्ला
नामलां-गेलेमपुआव दुमफ्ला-दुमफ्ला;
आवबा, रावनोबो दाबुं दे ।
उदालगुरियाव दावराव जादों
दावला बेरहाफोरा सिरि थादों,
फेसबुकनि लोगोफोरा बखिसोदों;
मा रोनावलाबायोब्रा ?
ABSU-NDFB आ दिल्लियाव थांदों
जान्था फाग्लाया गगा मोन्दों,
कनट्रेक्टरफोरा बिल्दिं लुदों
जरा लायै लायै हटेलाव थांदों;
मा आदा नांग्रां बाजै सिग्रान्ब्रा ।
मेलेमजिबिफोरा बुंदों बर'आ खमायबाय
NDFB फोरासो दाइ नांलायबाय,
हाम्फे-दुम्फेमोना (Revolutionaries) माय गायलायबाय

एम्बुबंगला (Politicians) फोरासो रंजालायबाय;
सिथोर बाथोर ।
आबौ-आबै गुजुखेब गुजुखेब
जाजोब्बाय हथ'सिराफोरा खेब-खेब,
गावजों गावनो दावसा मोखेब
जालांबाय बर'आ रानखेब-खेब;
दहाय फिसाफोर दहाय । □

बिबेकनि दावहा

अखा ना मोदै जाखो

ना आंगोफोरनि गसरनाय थै ?

बोथोरथ' नडा बे अखा हानायनि

बुब्लिसो रंजानाय-बाजानायनि

जौनि फुखि बेदरनि आलि

मुखुब बयबो हालि-हालि

माथो सिरिखो अब्ला सोलेराव आनि ?

मोदैसो नामा फालाय

अलंबार दावस्त्रिगोबा जाना जोंखौ नायहरनाय आंगोफोरनि गाबनाय

लांसुनिया फंबायफोरनि उदै नारलायनायखौ सहायनो हायैनि मोदै बोहैनाय !

जागौसो नामासै अबंलावरिनि बोर सारस्त्रिनाय ?

नडा नडा,

बे माब्लाबाबो जानो हाया,

अखायाथ' गुसु आरो दुंबुदसो मोदैया

बिस्त्राथ' गाबबो गैया;

आंखौ सिग्लाबहोनाय बैथ' दुडा सुवासो

खारस्त्रिं-स्त्रिं मोनामनाय गोजा गाबनिसो

महाभारतनि दावहाथिलियाव भगदत्तनि थै सिद्दावनाय बादिसो;

अ'... ना आनि बिबेकनि गोनो गोथोसो ?

हे आफा,

हरदो आंनो गोहो

बुजिनो, साननो आरो सहायनो

हायो जेन'— अखा, मोदै ना थै बिजिरनो । □

आं आइजो

आं सासे आइजो
आइजो नैजिसे जौथाइनि,
आंनि सिनायथि—
आइ, मादै, आनै, बाजै, आब' आरो गोबां;
खायसेनि नोजोराव मोनामबुं दाखोर
सोरनिबा थाखाय गाबगोनां खाखोर
माखासेनि थाखाय बिमा आं अन्नायनि मोन्थोर
नाथाय,
समाजनि लिरथायजों सोबखजानाय बाइदि बिमुनि जोन्थोर ।
नों बावगारबाय नामा
आंनि गोरबोआवनो जोनोम जादों—
बिहुराम, समर, बांबुर, उपेन, बिनेश्वर, सोमब्ला
नोंसोरनि मुंदांखा सुबुं;
फोथायनो गोब्राब मोनगोन नडासे
गावनि फिसाजोंनो खालामजानाय जिनाहारि
अलसिया बिदानि नासयनायाव बिनानावनि हज्जिनाय आलावरि-बिलावरि
दुखुजों नायख्लें-नायख्लें खालामजानाय सान अखाफोरनि ?
खेबसेल' बेखेवसाय गोरबोनि मेगन
गाबज्जिनायसाय— आयै, आनै, मादै, आगै
बेसेबांदि गोदै बोहैनाय दैमुनि दै,
दाखालामथारसै नों आंखौ लानानै है-सै ।
थुदो-थु आवगायदोनि
जानानै बिमा नोंनि लामा दिन्थिगिरि
बिनानाव महरै थुलुंगागिरि
अनसुलि बिबाजै नोंनि बोसोनगिरि
नागारलायना हिंसा, मुगैनाय, नासयनाय आरो फान्दायनाय । □

बिनानावनि बानजायनाय

बिनानाव—

बर'फोरनि गेजेराव मोनसे गोदान खाबु ओंखारदों
बेकार जोहोलावफोरा जज'-जाजाय ओंखारबोदों
जथाय हादुंगोराफोरनिफ्राय होनाय अफार
थानानोसै नामा आंबोसो सासे बेकार ।

आदा—

आं मोनथिगौ नों मा बुनो नागिरदों
बिसोर जोंखौ फोजोबनोसो थांखि लादों
आखाइनि जिनिरखौ आंगोनि थैजों दासु
नडाब्ला गाबनांगोन हारसिं मोदै रुखु रुखु ।

आं गोरान्थि नडा बिनानाव
सुथुरसो बिसोर जोंनि लामायाव
जोंनि थांखिया हारिखौ उदां खालामनाय
बेरेखा बिसोरसो जोंनि सान्नाय ।

गोरान्थिया सोरनि आं मोनथिया
उदांसिनि मुडाव सिथारलायनायखौ आं लुबैया
उदांसिखौ मोनोब्ला आंगोनि थैयावसो
मानोथो बुडामोन बे जांखिथाइया सोबखनायनि बेरेखा ?
बिसोरबो बुडोब्ला नोंसोरखौ सिथारब्लासो उदांसि मोनगोन

गावजों गाव सिथारलायनानै जोबस्त्रांसिगोन
सोरखौ लानानैथो हारिनि इउन दागोन ।

गुरैयै खावलायनाय आदा
दाखालामसै बिब्दि हाबा
सानबैसे मोदै गसरहोबावनो बर' बिमाखौ
गावजों गाव थै गसरहोलायना । □

आइजो गोहो

दांदुलि थफला बार' मसंला
ना बेदर नुबोला खारि अन्दोला,
हाबाब लोगोफोर दंबावोसो दाबोनो
खाबु नाइयै नाइयै बिनानाव गोदै लिंगोरा।
उदालगुरि टु ककराझार, धालिगाव टु गुवाहाटि
दाथाहाय लोगोफोर गारि गोनां सेंग्राफोरनि खाथि खाथि
फेसबुक वाटसआप गुबुननियाव दाबि टप आप
आजोलि नों सोलाजागोनबो सियाल बुन्दाजों ख्लाब ख्लाब।
लोगो आनि फेसबुकआव बर' दैमारी
खौरां हरो मेसेनजारआव 'कर भनति तुमि'
सिबायफोरखौलाय माथो बुंनो दाइया आंसो हायनारि।
क्युट गार्ल, लाभलि गार्ल नाड लोगोफोर सिक्किउरिटि पास
ललिपपसो जों सेंग्राफोरनो साना-बादाम टाइम पास;
नै माल'थि नै रैमालि थाखो मानो सिरि सिरि
आइजो होनना खोमाना दाला गेजेन नड जों हौवाफोरनि।
गेजेन जौनि हिटलार-नेपलियन, गानेध-मुस'लिन
सम थानायावनो हमनांगोन थुंग्रि नुमलि बिरगोस्त्रिनि;
सोर बुडे जों नेहाद न' इसिंनि ननेमा
दावहा थिलियाव थांब्लासो सिनायगोन थारैनो जोंसो हाजोमा। □

आंनि मिजिं

आंबो सानो—

आंगोफोरजों मोखां नायज्लाय नायज्लाय रुजु-रुमु रायजो जानो
बैसागु बोथोराव आइ-आफाखौ मान बाउनो

अनजालिनि हरनाय आरनाइखौ खर' खावखाना मोसानो;

नाथाय—

आं मोनसे बान्दोनि सिडव

हारि रैखाथिनि

उदांसिनि मुडव ।

मोनथिगौ आदा—

खायसेआ आंखौ मुगैयो

बोथिसे ओंखामनि थाखाय सै-सै खालामो

गावनि दान्दिसे सुखुनि थाखाय मेहेरो

मिरौ-जिरौ हारिनि इउन जीउखौबो बावगारो;

आं हमनाय आइजेआथ' नौनि बेरेखा नड

बिग्रायारि होनना सुथुरजों दावहा नांनायनिबो नड

बे आंनि रैखाथिनि थाखायसो

हारिखौ रैखाथि होनायनि मुडवसो ।

खेबसे सानना नायसाय—

गावनि हायावनो जों बान्दा

थागिबि हारि जानाबो हा गैजायै आन्दा मान्दा

खांदों सुथुरा जौनि बार-दैनि सान्दा;

अरणबारिया आंनि आइ-आफा

सान्दुं अखाया गामसा गस्ला

लेवार जिबौआ आंनि बिसिगि
थेवबो जोबस्त्रां होया बर' हरि ।

दासान आदा नॉनि सम्फथिया अरायनि
हारिखौ जोगारना थानो हारसिं खुसिनि
जौगानायनि मुडव दावखाया दावराय जानायनि
सम फैब्ला गाबनांगोन नॉबो ओंग्राम खबसेनि;
हनै नायहरसाय, आदै-मादैमोननि हालोद
खालाम जादों हारसा बांगालजों जोश्रोद-जोश्रोद
रावबो आवगायबोला नुना बिसोरनि खैफोद
सम्फतिनि हाबिलासावनो नॉबो स्त्रोद स्त्रोद ।

फै आदा—

आंथ' बुडाखै रैखाथिनि मुडव नॉबो आइजें हम
रान्नानै हर दुखुथिया बर' फिसाफोरनो सम्फति दम-दम
खावलायो नाथाय जिनजिखौ नॉबो हम
अब्लासो हागोन देरहासार जानो फेजेन्ना बर'नि जम;
आंनि सुखु-दुखुनि जेबो दासान
थांखिल' ला ओंग्रारथों सानजाहा गोरलै सान
जोंब्लावथों जुगामि बर'नि मान । □

आंनो थरथिंसे दै नांगौ

(मुगानि साखि)

आयै,

आंनो थरथिंसे दै नांगौ

ख्रां-ख्रां रानखांनाय गारामाखौ फिसिनो

ख्लां-ख्लां गांहाबनाय बिखाखौ फोजोनो

थोथोर-बोबोर सोलेराव फेरलेबसे दिदोमथि होनो;

नोंनि आखाइनि थरथिंसे दै नांगौ ।

भाद्रनि थिं-थिं सान्दुंनि दुंहावनायाव

सोरमायलांबाय बाथौसालिनि थुलुनसि

लरहायलांबाय सिजौ

गावस्त्रालांबाय आलारिबाथि

जागौसो नामा राजखान्थिनि ग्लाब-ग्लाब मिनिनाय;

नोंनि आखाइनि थरथिंसे दै नांगौ ।

आयै,

नांगौ थरथिंसे अमृत आंनो

ख्लां-ख्लां उखैनाय सनाफोरनो दौनो

रानख्रेबलांनाय आदैयाव बोलो सुफुंनो

बिदिन्थानि सुजुनाय जारिमिन संदाननो;

नोंनि बिखानि थरथिंसे अमृत नांगौ ।

नांगौ नोंनि गोरबोनि थरथिंसे थै

सुगलायनाय बिखाखौ फुदुंनो

बिथिं आन्दायनायखौ थुलुंगाखांनो

होनो सिनायथि सिगां जोलैनो ।

नोंनि दै, अमृत आरो थै
बेयावनोथ' दं जोंनि जै
मानोथो जोंलाय गावजों गाव सै सै ।
हारानिफ्राय सेरमायनाय दै
आहारनि थरथिंनाय अमृत
आरो बिखानि जिरिनाय थै
बेसेन बेफोरनि मानोबा हमदांनो हायाखिसै ।
दुखुनांथाव आयै नोंनि जोलैया
बेसेनगैयै गुरस्लायसुलि फारिखान्थिया
बेफोर दाइखौ आंनियाव बिजिरदो
थेवबो बासायदो बाथौसालि
नागारना गासैबो दाइ दोरफो
जेन' हायो जाफिन्नो जों खौसे हारि;
आयै, आंनो थरथिंसे दै नांगौ । □

रौरोथोन

रौरोथोन, अ' रौरोथोन,
नोंनि गुवार बिखायाव रनसायजानाय लिरबिदाड
खेंखुर-खेंखुर सोमजिहोयो गोरबो बिखायाव;
हानायमोनब्ला आंबो नोंनि सारथि जानो
फुंखा सुबुं नोंबादि लामा दिन्थिनो ।
गोरबोआव नोंनि मेहेरगोनां खन्थाइनि माला
बिजिरो हारिनि थैनाय थानायनि जाउन
रनसायो आजै-आजौनि गुनगोनां आसार-खान्थि ।
नुफेरबायाखै माब्लाबाबो नोंनि खाफालखौ खेबजुं-जुं
नड रावआबो खान्नां-ब्रां
बयबो बयनिबो नों आंगो
बिनिखायनो मुड नोंनि रौरोथोन
बरनि सिनायथि नों हारिनि नेरसोन
रौरोथोन, अ' रौरोथोन ।
सोरगोआव आंगो लोगो आइराखि गराइनि
दावहाथिलियाव साखि नियाइ-अन्याइनि,
समजों खारफायो रावखौबो लामानाइया
मोन्नाय-मोनै आरो जेन्नाय-देरहानायनि हिसाब लाना
जीउनि बेलासेयाव बयबो गुगुरुबफैखायो नोंनि खाथियाव
रौरोथोन, अ' नों बरनि आंगो रौरोथोन । □

अन्नायनि आबिर

खेंखुर खेंखुर मोन्नाय बोरलिया गोसोआव
जाखाँफैयो दाबो बै बुब्बिया—
फागुननि सानस्रि
अखाफोरनि मिनिनाय
बोरैबा गोसोखांबा लाजिनायबो मोनो
आलारि बिदिन्थायाव हाया थानो बबा निजोम जानाबो ।
मास्थार लोगोफोरा बुंसोलायोमोन
जोंलायनो जरासे धनेज दाव
बोराइनासो हमदांनो हाबाय आंबो
खालामोमोन अनजालिया आंखौ जोबोद दाव दाव ।
गोसोथोब्रेलायना हाबा जानायनि
साबा फिसानि बिमाब्लाबो नुयोमाथो उपेस्वरि बादि
हाबाब आफा इसोर खावलायो बारम्बार
दानाँफैथारथोंलै सयथिबो आंनि अनजालिनियाव रं नाम्बार ।
बेसेदि मिलौदो बै हरा, बिबारि एमा
अनजालिनि गुरै खावलायाव हारांगा हाथायनि आबिर गानाया
सान्नाय सोमजिखांदोंमोन इसोरा बिखौ आंनोल' सोरजिखादोंगोन
हानायमोनब्लालाय थाबिस बादि गोदनायाव आलायना आलो आलो लाफागौमोन ।
हाया थानो गोजानाव नखर नागारना दान्दिसे
उन्दुनोबो निजोमै हराव मोनजायाब्ला अनजालिनि सावग्लिनाय गय इसे
खैदां खैफोद मा फैदों मा थादों गोरुस गैया बेफोरखौ आंहा
सान्नाया मोनसेल' फैगौ जोनोमावबो रायजो जागोन रोहो रोहो जोंहा ।
रागासो जाबायलां फिसौफोराबो बुरिजों होंगो दोंगो
मेंना फैब्लाबो मिनिलाबायो फाग्लिया बिबो नादों रोंगो
अखानायै हले आदोर खालामो सिबाय
सब खुदुमना खावलाय बिलिर बिलिर आंनि सैनाय । □

बडंसा आं जगतगुरु

मुझ आंनि बडंसा

हादोरा आंनि प्रागज्यतिषपुर, कामरुप आरो आसाम

सिनायो मुलुगनि मानसिफोरा आंलायनो किरात, असुर, म्लेच आरो दानब

सोंखारिसोगारो, आंलायनो बिसोरनि जौगानायनि बेरेखा गेलेयो थान्दब;

बबेखानि, आंनि राव-थुनलाइ, धोरोम आरो आसारखान्थिया

बिगियान, जोंलारि शास्त्र आरो सानखान्थिया

बै हारसाफोरनि जौगानाय सोदोमस्त्रिनि फुंखा आरो थुलुंगा

मानोना बिस्वगुरु, बिफागुरु आं मुलुग बिखानि।

महाराजा आं नारखोबुदां एबा नरकासुर

थामहिनबा, नरकनि राजा एबा पृतिबि एबा प्रागज्यतिषपुरनि राजा

फोरमायसोयो हले गावसोरलायनो सोदोमस्त्रि गोनां, गोथार इसोरनि फिसा;

बिनिखायनो आं पृतिबिनि असुर, म्लेच आरो दानब।

आंनि मुझ भगदत्त, गुबुन मोनसे मुझ हिरिम्ब

आंनि जिलिरनि बान आरो आफानि गासिन्नायजों जानांदों सुथुरफोरा

थेर-बेथेर

राहा नागिरनानै दिग गोमानाय लावखार गैजायै फालोफोर बादि लेथेर-फेथेर

मानोना, बडंसा आं जगतगुरु।

आंनो रुकमिनि, आंनो भानुमति

आंनि आखाइयावनो दं सनानि साबि, जादब आरो कुरु फोलेरनि न'मा न'नि

आंनो उषा, आंनो गपिनि (नरकासुरखौ फेजेन्ना कृष्णनि लांफानाय जिद'

रोजा बर' सिख्लासाफोर)

आंनि सोदोमस्त्रिआनो नोंसोरनि समफल थैनाय थानायनि।

आंनि सिथ्लायव जेब्लायबो दाहालबादि गसंना थायो आफा बोराय बाथौ

गोथार न'मा-न'आव दिथा होबाय थायो बिमा माइनाव

बेनिखायनो गोलोमदै र'-र' गसरगार होनांदों बिष्णुआ हरिहरनि दावहायाव

थामहिनबा, बडंसा आं जगतगुरु।

ए, गोसोआव दंदा हिउयेनसांनि आंखौ बाख्नायना लिरनाय जारिमिन बिलाइ
नायगोमोहाबदोंमोन्दा लाजिबांसिनैब्लाबो नुनानै आनि हायनारि

गान्नाय-जोमनाय,

गनायना लायाखैमोनफा सामराज्योआव सिगाडव थारैनो बडंसांनि

दामनाय-देनाय

फोरमायना लायाब्लाबो नाजावदों नडासे बडंसा आं जगतगुरु ।

आं मावनाय, आंनि बिबेक बेफोर गासैबो फांसे साल बिफां बादि

खोमथा-था

बिखायनो नोंसोरनि सिगाडव मुंदांखा आं साल'स्ताम्बा,

आंनि गोजाम नबथियाव दिनैबो बिखा फोरदान्ना गसंथाबना दं

गोथार बाथौसालि

जाउनाव, दावहायाव देरहा-देरहाबो गेजेनखौ गनायना लानांदों तुर्किज हारि

(1206 AD) ।

आंनो कसारि, आंनि मुडानो लालुं, राभा, गार', देवरि, सुतिया, डिमासा

आरो मेच

दिहिं, दिसां, दिक्रं, दिमौ, सबनसिरि आरो बुरलुंबुथुर

मिथिंगानि सोरजि गासैबो आंनिनो मुं,

मुलुगनि गिबिसिन जोंलारि शास्त्र बिद्धानि बिगोमा प्रागज्यतिषपुर

बिनिखायनो, बडंसा आं जगतगुरु ।

आं हायनारि नोलमुनि,

हेव मानिनांदोंमोन आहम राजा सुहुंमुंआ बोर थानायखाय आंनियाव

बाथौ बुरिनि

आं लासित लालुं (बरफुकन),

आंनि थुंग्रिनि मोदान्नायजों जानांदों मुगलफोरा आसुं-आबुं,

आंनो जावलिया देवान आरो जोहोलाव तुलाराम

बृटिसनि सिलाय बारुदनि मोनामग्लुंनायावबो जायाखै आं थोथोर-बोथोर,

आइजो आं गामबारि, रोनुसुनद्रि, थेंफाखि आरो बिरगोस्त्रि

फुंखा आं रांखान्थिनि, सोनारदोंमोन बृटिशफोरा अखां नांगा-नांगा साम्राज्य
 लुखानायनि
 आंनो गुरुदेब कालिचरण ब्रह्म, रानना होदों अमृत बाणी खौसेथि आरो
 सांग्रांथिनि
 खदै गना जानांदों गल'-ल' उच्च बर्ण हारसा हारि, नाजाना एसिमिलेसन
 खालामनो हायैनि,
 आंनो बिहुराम, बिनेश्वर, सोमब्ला, गारलाबाथा, समर, सुजित आरो
 बांबुरगोरा
 इउन जोलैनि मिजिं सुजुना थै होनोबो दाबोरसेबो फावसाया,
 आंनि मुडा बडंफा उपेन्द्र नाथ ब्रह्म
 सानस्त्रिया आंनि गेरेमसा हारि दानायनि
 थांखिया फिसाफोरखौ गादबजानाय, नासयजानाय आरो सोबख'
 जानायनिफ्राय जुगामियै रैखाथि होनायनि,
 Global मुलुगाव, मेलेमनि दावहायाव, गायसनगोन देरहासारनायनि
 फिरफिला गाफलेना खैसार सुथुरनि
 बडंसा आं जगतगुरु ।
 बडंसा आं जगतगुरु ॥
 बडंसा आं जगतगुरु ॥।। □

नखर दावहा

अन्नाया गोमालांबायसो
आंगोफोरा नागारलांबायसो
बोरैथो हाबावगोन जों
हारिनि मुडै आवगायलांनो
बोरैथो हाबावगोन जों
इउननि थाखाय खौसे जानो ।
नोंबो सानोब्ला आदा नोंनो सैथो
आंबो सानोब्ला आंनो सैथो
जालांसिगोन नखरा जोंनि सोरलां बोरलां
खालामनांसिगोन आइया मोदै रथ' रथ'
हायैयाव सहायनो जोंनि नखर दावहा ।
आलासिनि आर्थिं आफानि दागोआ
नखरनि माइनावसालिनि सिथलाखौ मैला खालामबाय
सुवा नांबाय नमा न'नि हासिबा
गोदानै सारिजाफैनाय फिसौआबो
दाहा हगारदों नागारना बिमानि आहार जानो,
दाइया आदानि आरो आंनि मोनसे नखर दावहा ।
ग्लबेल मुलुगाव गुबुना मुखुब खौसेथि आरो जौगानायनि
अखां नांगा नांगा गंसे समायना नखर दानायनि
मिनि हाला-हाला रुजु-रुमु रायजो जानायनि;
नाथाय,
जोंनि नखरा गाबगादों धोरोमनि आसिलाजों
बावगारना हारिनि आसारखान्थि, हारिमु, राव-थुनलाइ
सोंखारिलायदों आदाजों आंजों हिन्दु-खृष्टाननि सानस्त्रिजों ।
जों सानैनि दावहायाव सोरबा सासेया जेनखागोन
सुखु-दुखु आरो जोबस्त्रांनयनि बिबानखौ देरहाप्रायानो रुजुननांगोन

मुलाम्फायाथ' बैहासो जागोन, देरहासार सिनायहायै आलासिहा
दायनां फोदोनां जोबनायाव बर' हरिनिनो सुजिनां
लरग'-लरथ' न'नि मुदायाव दावखा सिलानि हां-हां।
जोंनि गावबा-गावनि जेनरोडै; हेव मानियै आरो गुरुगुजिया गोसोआ
बोरोनथाय नांहोसिगोन इउन जोलैखौ
रोमोनानै ज्रय सिरिहोसिगोन थाइखानाय फिथाइखौ
आलासिनि हाबिलानि फान्जारियाव थे नांथेसिगोन
आइनि मिजिं सनाफुरि बर' हादोदआबो
सिमां जानांसिगोन दिनैनि नखर दावहायाव।
बड'फानि सानस्त्रिया गेरेमसा हारि दानायनि
नोंबो थां आरो आंखौबो थांनानै थानो हो
होनाय रैखाथि— सोबखनाय, गादबनाय आरो नासयनायनिफ्राय;
आदा, जों सानैयाथ' थार आरो सैथोनि बेरेखासो माथो
बिथिं आनदायनाय लोरगि गैयै दिड्ढा बादि
हान्जानिफ्राय हुरन जानाय रुगिया मैदैर बादि
इउन गैयै नखर दावहानि मिरुथावनि।
सि सि,
नियाइ गैयै बिथिं फारसे जों मालाय मानो हान्थिबावनो
जोंनि मुलाम्फानि थाखाय नखरखौ मानो सिफायनो
नखर दावहाया बड'फानि सानस्त्रि आरो इउन जोलैनि बेरेखाब्ला
नोंबो आंबो जों बयबो फै हान्थिदिनि आखाइ हमलायना
सुनि बानि सोरनिबा थुनज्जलायनायखौ हिउ जोगारहरना,
गोदान जोलैनो गोदान फुलि गायफिननि। □

आं

आंबो बुडे— आंसो थार

नोंबो बुडे— आंसो थार

बिबो बुडे— आंसो थार

बयबो बुडे— आंसो थार;

नाथाय, समा बुडे—

सैथो, मोक्थाडारि आरो मावथि, बेफोरसो थार ।

सैथोथि गैयै सुबुडा

थगायनाय

फोलानाय

इनायनि संदानगिरि,

एमब्रायै बुंगोन इन्द्रनि गराइआ गुफरब्लाबो गोसोम ।

मोक्थाडारि नडै आरोदायारिखौल' सानग्राया—

बोसोनगिरि

मेलेमजिबि

गागि महरैल' जेब्लायबो सिगां सारिनि जानो हासथायो ।

मावथि नडै अलसिया सुबुडा

बिबायारि महरै

बेक्वित्तखौ खोमानाडे ।

जाय बुंगोन आं—

सोदोमस्त्रिनि बायजोनि रुगुडाव

माहारिनि सानस्त्रिनि गुबुन मोनसे दिगाव,

समाजारि आसार-खान्थिनि उलथा दिगाव ।

जाय बुंगोन आं—

सैथोथिनिफ्राय आनज्रायलांबाय
मोक्थाडरिया बिहारुसो जाबाय
अलसिया महरै बिखुं होजोबाय ।

बिनिखायनो, समा बुंदों—

दाबुं 'आं'
दासान 'आं'
अबंनि सोरजिथायसो जों
आं, नों आरो बि
बेमफोरसो फेरलेबसे खंसे लैथोनि
सानाब्ला खौसेथि जों बयबो जों
सानाब्ला खौसेथि जों बयबो जों
सानाब्ला खौसेथि जों बयबो जों । □

दलिल

“बिबाना गिलिरथार आरो थामोन्थाइनि
मानोना, नों गंसे सनानि साबि।”
नोंनि फंफ्रोमबो रावा बानगोनांमोन
अखा सोगोमनाय बादि बिखायाव नाडोमोन
मिरौ-जिरौ बिफाडबो जेन’ गोदान बिलाइ खिलिखाडो
बायफ्लेनाय गोरबोआबो जरा लाफिनो
रानज्रंलानाय मिजिडव गोदान सानस्त्रिनि दोहौ सोमजिखाडो।
मुंख्लानि दानसे सिगां नों आंखौ बुंदोंमोन—
“हलाय दाजाहो मुंख्लानि थैनि बेसेन
अनसुलि बिनानावनि जिनाहारि जानांनायखौ”
हा बुनानै बिथा नागारनांनायखौ”
आरोबाव बुंभावदोंमोन नों—
“बिमानि रावा जोंनि दाहाल,
हारिमुवा जोंनि कबज,
आसार-खान्थिया थुंग्रि,
बे मोनथामानो थामोन्थाइनि दावहानि मोनथोर।”
आयु हाबाब,
आं गिनायसो मोनबाय,
सैथोनि सावगारियाव आं आन्दां-मिन्दांसो जाबाय;
नोंनि आयनाबादि दलिलनि बाथ्रा भावफोरा
खुगानिफ्राय गनाय अरबादि बाणिफोरा
दैमुबादि गोथार अन्नायनि रावफोरा
गावनिल’ सानग्रा, लांसुनिया आरो थगायसुला
आंनि बे गोहोखौ समखि होबाय। □

बालन्दि दावब'

आसार दान

गिलुबालु अखा बोथोर

थिं थिं सान्दुनि दुंखावनाय

सम सम बारहुंखानि सिबखावनाय

गफायगोदान फिसाफोरखौ खानायनि दाहा

उस, एफाग्राब अत्राय खानाय गैयै थासारि ।

सुबुंहा गैया सुबुंथि

होदोंब्लाबो मिथिंगा राणिया मोनसे आसारखान्थि

बारसियोबोल' गाव गावनि मुलाम्फाजों मोनसे नोजोरथि

बिनिखायनो अबथिरा खोमानांबाय फिसाइ, जानांबाय बालन्दि ।

सिउ सिउ बारहुंखानि सिमब्रेनायजों

जानांबाय हावरिया फिसाफोरा गोसो खेंखुर

अखा सारन्थाइजों बुखेबजाना लाद्रा लुद्रा

हिंसाखुरिया आरो लुबैसुला सुबुंजों होसोजाना

बालन्दि बिमायाबो जानांदों हामा दैमा ।

दाइया सोरनि जाखो !

मिथिंगा बिमानि ना गुरगुजिया सुबुंनि !

सिबायफोरा जानांदों साफा दाबफा;

थानायमोनब्ला बयहाबो निति आदर्श

जेरै ओंखारो साना सानजाहा आरो हाबो सोनाबहा

थानाय नडमोन हिंसानाय, मुगैनाय आरो फोलानाय

नोंबो जानानाय नडमोन बालन्दि

साथिफबगौमोन जेथिंबो आलायारन गाब

रिंहाबगौमोन रिंगुदामसानि गोमसारनाय

सोरांगौमोन मुलुगा सान्थिनि आलारिजों । □

अनसुलि बिमा

बेसेबांबा सोमोनांथाव नॉनि अन्नायाव
मिलौदो-दो दैहाबनाय गोरबोनि गाराडव
महिमाजों बंफबनाय मिजि मिजि आसिफोरखौ
नायना गोमोहाबदों हनै मोदाइ दावदाइफोराबो
मानोना, नों बर'फोनिखुइबो गुफुर आरो गोथारसिन अनसुलि माइनाव बिमा ।
ग'-ग' गग्लिं-ग' दाव खख्लिंनि रैसुमै रावाव
आन्थोर गोरोब गोरोब नॉनि हाइला-हुइला मोसानायाव
आर्य हादुंगोराफोराबो गल'-ल' नायगोमोदों
दावहाजों नड आयै,
नॉनि रैसुमै राव आरो समाइना-रमाइना हारिमुवासो
दाहाल जानानै बासायबाय बर' हारिखौ सुथुरनिफ्राय ।
नैजिसे जौथाइनि दिनैनि मुगायाव
गुबुनफोरा हांखुर जालायदों अख्रां दावबायनायनि
जों हले मोखां सोमथाबलायदों गाथोन सोलाय सोलाय दै लॉनायनि ।
आमाइया बुंदों गोदानथि आदबखायदा (innovative ideas) नि बाथा
'गेरेमसा हारि' दानो बड'फानि सोरजिनाय सानस्रिनि खोथा,
आदैया सुबुरुनदों गावनो-गाव गोख्रों (empower) जाग्रोनांगोन
अब्लासो बादायलायनायाव जौसे जौखोन्दो देरहासारगोन,
आदाया हले बुडे, जानांगोन बयबो बाहागोलालायनो हाग्रा (participative)
सुफुंजागोन अब्लासो गुदि जेंनाफोरा ।
आयै, आंथ' नुवाखिसै नॉनि अनगा रावखौबो मोक्थाडारि
बुंदोंल'सो नामाथाय बिसोर राजखान्थि लोब्बा थानाय आरोदायारि
गावबागावनि मुलामफानि सानसिमाडारि ।
दाखालि नोंजे बुंदोंमोन आयै—
“जाग्रोनांगोन फिसा गावनो नंगुबै फाइखि,
गुबुननि नोजोराव इउनसंगिरि,

अब्लासो जानो हागोन बोसोनगिरि,
 खाना-खुजा, बेंग्रा-बेंग्रिनि दिथागिरि।”
 नों हास्थायनाय बादिनो जों साफ्रोमबो जानायमोनब्ला
 गोजौ-गाहाय, हिंसानाय-मुगैनाय गैलायामोनब्ला
 आखाइ हमलायना बारनो हागौमोन बे रुगुनिफ्राइ बै रुगुसिम
 गसंथानो हागौमोन सिव-सिव सिमब्रेलायनाय बारहुंखानि बेरेखायै
 राफोदसिन जागौमोन आयै
 कबज नोंनि रैसुमै राव आरो हारिमुआ।
 आंथ' इसेबो मेडखै आयै
 लाजिनायबो गैया आंहा नोंनि फिसा होत्रा सिनायथि लानो
 सोरबाफोर बुंनायबादि गामसा गानब्लानो जाम्बासो सानजानो;
 खोनादों आयै,
 मैया सासे गन्थं गोलावा बुंदों—
 “गाला नों दिनै समायसोगारदों
 नोंनि आबैनि बिबैया जोंनि आबौनि बिबौजों हाबा जादों
 नाजादोंमोनब्लाबो एसिमिलेसन खालामनो जोंजों
 हामाराखिसै देरहानो थानायखाय थार बर' बिमानि फिसा नोंजों।”
 आं बुजियाखै आयै,
 सोर मा सानदों मा मादों;
 मोनसेल' नोजोर आंहा
 हेव मानिया आं नोंनि राव-हारिमुखौ लाना,
 आवगायबायल' थागोन आंनि थरथिंसे थै थाजासे
 जेब्लासिम थागोन, नों बिमानि अन्नाय खेन्दासे। □

खन्थाइगिरिनि सिनायथि

बोधोरा मोनद' दं

जेरै—

गोजां बोथोर, दुफां बोथोर

मेसें बोथोर, उदां बोथोर

गोलोम बोथोर आरो दैज्लां बोथोर;

मोनफ्रोमहाबो गावनि-गाव आखुथाइ आरो फारागथिबो दं ।

नाथाय, खन्थाइगिरिहा मुंबो गैया फारागथिबो गैया

जेरै—

गुफुर आरो गोसोम

मोजां आरो गाज्जि

सुखु आरो दुखु

गैया मिनिनाय आरो गाबनायनि फारागथि ।

खन्थाइगिरिनि रेबगनहा मोनसेल' नोजोर दं

जेरै—

गोरबोनि आवलिनाय लाभानि निजोरा

हिंसाखुरियाया दोफो-दोफो खामजागोन

अन्याइआ रुखु-रुखु गाबनांगोन

खु-आखुथाइया संहार खालामजागोन;

नाथाय,

अनसुला आरो अहिंसाया जेब्लायबो दाव-दाव खालामजागोन ।

खन्थाइगिरिहा जुगामि नबथि गैया

जाय देरायाव थायो थि रुगुंबो गैया

बरंना, हारसा-बांगाल हारिबो रानरोड;
बिनि जाथियानो सैथो
बिनि धोरोमानो सैथो
बिनि जीउमायानो सैथो
मानोना,
खन्थाइगिरिनि सिनायथियानो सैथो । □

सोरजिथाइ आरो सोरजिगिरि

सोरजिथाइ आरो सोरजिगिरि

मोननैन सोमोन्दोआ रुजुजायि ।

सोरजिथाइनि गेजेराव सुबुडानो गियानिसिन जिब

ग्रह-नक्षत्र

दावमा-दावसा

जिब-जुनार

एम्फौ-एनला

दैमा-दैसा

मिथिंगानि बारदै-सिख्त्ता

सोरजिथाइब्लाबो सोरजिगिरिनि परिकल्पना ।

नियाइ आरो अन्याइखौ बिजिरनो

सैथो आरो असैथोखौ दिन्थिनो

धोरोम आरो अधोरोमखौ फोरोंनो

सुबुं महरै—

राम, कृष्ण, जिसु, हजरत महम्मद बाइदि जाना

सोरजिगिरिआ गावनो जोनोम जाफैदों;

बिनिखायनो, सुबुड सोरजिथाइनि गेजेराव बिमुं मोन्दों—

सोलोगोनां, गियानि आरो इउन बिजिरगिरि,

अखां आरो पाटाल सौसि सौसि दावबायगिरि

थेवबो नं बिगुमा मोन्द इन्द्रियनि

हेव मानिनाडे दावसिन-दावला, जिब-जुनार, एम्फौ-एनलानियाव । □

देग्लाय बैसागुआवनो दुमफेरे-रे

दाखालि फागुन दानाव
नोंनि मोदोमफ्रु-फ्रु बिउटि पार्लराव
अहाया अहाया मासाज खालामजानाया
खामिहारायाव रुइदुब-दुब आसिजों खुरजेर खुरजेर खालामजानाया
फाग्लासो, बिमायनो गाहामथार मोन्दोंमोन ।
आं मिसिबथाबना देहाखौ गथायदोंमोन
बिखा फोनां फोनां नोंबो मासाज खालामदोंमोन
जेन'बा बिबारि एमावसो सानैबो दंमोन
सिमां फुरियाव
मौसुमि बारनि सिबखन्नायाव
गोदना देमग्लाय देमग्लाय जरासे हांसो राजाया बिरबायदोंमोन ।
नोंनि गन्थजों गनाय स'-स' हांआ
आंनि दोंनैसो गोमोन दारिखौ फोरलाब फोरलाब बिरहोनाया
गोरबोखौ आयखां बायखां जाहोदोंमोन
चैत्र थांगौब्ला थांगौब्ला
बैसागु फैगौब्ला फैगौब्ला
हाथासि गोसोआ उरां फारां नेनानै थादोंमोन ।
अरनि बिदुंजों लाहा आवलिनाय बादि
आंनि राखथि-थि सोलेराल' रुइलाडाखै
थफसिजों लोगोसे साबा फिसाखौबो आं बावगारासै,
दै बालथिसे खावब्लानो हेस-फेस जाग्रा बोराइया
नैजि बोसोरनि सेंग्रा जाथिबादि सानथारदोंसै ।

नोंबोथ' एसेल' समायना नंखाया
 सानै फिसानि बिमाब्लाबो बिसाइ गोनांबादि नुखाया
 बिखायाव नायबोला फागुन फागुन मोनलायलायो
 खावलाय बिलिरबोला दुफां दुफां नांलायो
 मेगनाव नाइयोब्ला बैसागु बैसागु बावगोमालायो
 हाबाब, सानफ्रांबायसै—
 जि बोसोरसो गदायै मानोथो हाबा जायाखिसै ।
 सयथिबो, देग्लाय बारदैसिख्लाय
 बिमायनो बायदेमलाय सिदेमलाय जासोगारदों
 दाव खौवौवाबो गारां सोमाव सोमाव देंखो बोदों
 गोरलै बिलाइया खर' थिखं-थिखं बराइदों
 हाबाब रंजालि बैसागु—
 नों फैमारबायसो
 आनि नैथि खोन्दोखौ जाफुंहोनो
 गोजाम गलाखौ नागारना गोदान गला लुखांहोनो
 सिंखावरिनि खोमाजों खोमा बुंनायबादि
 देग्लाय बैसागुआवनो दुमफेरे-रे खालाममारनो । □

आइनि फोरोंखान्थि

नै अनसुलि माइनाव बिमा
नोंनि अनफावरि मिनिखैरो-रो महरा
मिलौहाब रैसुमै गारांजों अ, आ आरो क, ख फोरोंनाया
मिजि-मिजि आसिजों आगर-आखाय एरनाया
सिख्लाय अरसै मोज्लाय अरसै खांनाय बानाया
जीउनि बेलारोम बुब्लियावबो मोनो आंगाय आंगाय।
आं उनदाहा जानांदों आयै
नोंसौज्लाखौ मास्थार खालामना
हायाखिसै बिखौ खालामहोनो थैखौ गोलोमदै
बिनिखायनो, आंनि फिसौआबो लानो रोडसै सोमोन्दो आदै मादै,
बिसोर बावगारजोब्बाय
नों गालांनाय आसारखान्थि
राव-हारिमुनि फारिखान्थि
मानोना,
फिसाफोरा गावनि खसाबखौ नागारना गुबुननिखौ गानहोबाय।
आयै नों खोनाबायदा,
आंनि फिसौ नों आयंआ
बुंदों, आंलायनो हायजिनिक नड
गान्नाय-जोमनाय जानाय-लोंनाय अल्ड मडेलनि होन्ना;
बिसोरनि लिभिं स्टाइलआ हाइलि सफिसटिकेटेट
सानफ्रोमबो रुग-बियुगजों गोफबनांनाय स्ल' पयजनिं फुद हेबिटेट
जों अल्ड मडेलनि आउट डेटेट
नाथाय, लाइ-लाफा फालें-मुला लाफासायख'-खेरादाफिनि

जानानै देरबोनाय सिनियर सिटिजेन अरगेनिक फुद हेबिटेट ।
थाखोसेयाव फरायनाय गारां हाखो-खौरां हांखो
बेखौ लानानैनो देरगायोमोन जों जालायथारोमोन होंगो दोंगो
“बर’ राव गेवलांथों
बिमानि राव थांना थाथों”
बेनोथ’ जोंनि माहारियारिबादनि फुंखा
इथनिक नेसनेलिजोम, जांख्रिथाइनि खाम्फा;
नों आयंमोना हले बुंसोलायो—
दा ग्लबेलाइजेसननि मुगा
मुलुगा गंसे गामि, गसिबो जानांगोन साखाफारा
नडाब्ला,
राव-थुनलाइयावनो गोदोहाबब्ला जानांगोन जुगामि जाम्बा-जाम्था ।
नाथाय,
बिमानि रावनिखुइ दैसिन मुंबो गैया
बिनि अन्नायनिखुइ आंगोसिन रावबो जानो हाया
बिमायानो सोलोंथाइनि मिरुथावनि
ग्लबेलाइजेसननि मिरुथावनि
फोलेरारि माहारियारिबादनि मिरुथावनि । □

फागुन दाननि जौमोन बुब्बि

सानसेखालि लांगोनानि बैग्रि बिफानि सायख्लुमाव
बाजै माल'थिनि बैग्रि बाथोन थिं-थ' थिं-थ' देनायाव
बुंखानाय लेखा,
खावब' जिरायहैबाय आंबो थिखानाय खामफ्लायाय ।
बाजैया जागायबाय
जानायाव आंबो मुखुब जाबाय;
फागुन फागुन नांबाय आगै
दुफावलु जोमैयाबो हनै गेलेदों आमै-जिमै ।
अखां नायदावै बाजैआ बुंलांदोंमोन
बाथोन सोलायैनो आंबो सान्दोंमोन
मिथिंगानि गेलेनाय बेफोरलाय जाखागोन;
नाथाय,
गोरबोनि आमाइथुआ माबा-माबि मोनखाडो
बिरफुंनाय सोमब्बि तुलाखौ
रैदुब-दुब मिजि-मिजि आसिजों
बाजैआ आंनि खावलायनिफ्राय जेब्ला खेबखाडो ।
समा मा एफाग्राब निस्थुर जाखो
खावसे बैसोआवनो सिबायनि सिन्दुरखौ मानो खोमोरखो;
थेवबो बोरैबासो मोनलायलांबायलां
बानलु बोरदोननि आलौनायजों
जाहाबनाय खावलायाव ज्राम-ज्राम गोलोमदै सेरमायनायजों
हरखाब बुंफ्लांबाय आंबो—
नंमारगौलै आंनि बाजै सना

फागुन फागुन नांमारथारबाय ।
 आं बाजैखौ बुंनाय—
 दाखालि आफाया दैखराव रुवाथिखौ एदावनाय
 बानलु सोलानाय आसिजों बाजैया आंनि गन्थडव थुलुनहरबाय
 आरोबाव बुंबाय—
 थोर जाम्बा बोरायहा फागुननि बार नाड नामा ।
 बारि खनानि मान्दार बिफाडव
 दावस्त्रि हाजिनि जि-जि जा-जा गाबस्त्रावनायाव
 सावगारि बिलिरफैयो गोरबोनि खाखोराव
 खुगा सोथाब सोथाब बिबारनि बिदै सोबदों
 जेन'बा बाजैनि जारौ-रौ खावलायाव ।
 आंनि हाड थिफुं-थिफुं जादों
 गन्थडबो नारानि फेम्फा सुनाय बादि फे-फे गाबदों
 बाजैआ आसि गावस्त्रानाय बैग्रि बिदै नांब्लासो आं हुस मोन्दों
 मिनिखैरे खालामना बाजैआ बुंदों—
 हाबाब आगै, दिनैसो फागुन फागुन मोनमारदों । □

बाना

संसारनि जेथिंबो हनै बाना आरो बाना
धोनि हादोरफोराव धोन-दौलतनि बाना जादों
गोरिब हादोरफोरा बेफोरखौ मोन्नायनि संदानना हांखुर जादों,
बेखौनो नुनानै थामथि सुबुंसाया मिनि-मिनि दालाल खालामदों ।
अस्त्रनि बाना जादों
अग्नि अस्त्र, बायु अस्त्र आरो जल अस्त्र
जाय जेरै हायो एरै देरहासारनायनि फेरफाथिलायदों
गोमो, गोसोम, गुफुरसा
खृष्टान, हिन्दु, इस्लाम बायदि बायला
मेगना मुनिस'आ नाथाय गोरबोआ हमदां हायो
हिंसानाय, नासयनाय, गादबनाय, सोबखनायनि बाना जादों ।
मिथिंगा बिमाया रागा जादों
सुबुंनि अहंखारि आखुथाइया बांद्रायसिन्दों
बिमाया अनसुलिखायनो खाबु लासिन्दों
बिनिखायनो, अबथिरा समावबो संहारनायनि बाना जादों ।
सत्य जुग, त्रेता जुग, द्वापर जुग आरो कलि जुग
थामहिनबा चतुर्युग,
माखौ बिजिरबावगोन, थांखिया बयबो गावनि गावल' भुक
कल्ड वार मुंनि जोमै दाखाया बुप्लेजोब्बाय सनानि आबादखौ
साइलेन्ट किलार महरै अहंखारनि प्रतिधनिया गोदना सेरथेबाय इउन जोलैखौ,
हनै जेथिंबो गिखंथाव बाना आरो बाना ।
नोंनि नखराव मानि बाना फैदों ?
गोरबोआ मेव-मेव जालायनाय मानि हज्रिखावदों ?

नोमानि फारनै खावलायनि बोहैनाय बै मोदैआ
सिथाबरोम-रोम, नड नाथाय आसारनि अखा दामब्रा
बेथ' नोंदा बिहुराम, समर, बांबुरगोरा
गारलाबाथा, बिनेश्वर, सोमब्ला
असे फिसाफोरखौ खोमानानायनि मोदैनि बाना नडाहोनब्ला ?
बबेखानि,
दबथायहायै रागानि बाना
सहायहायै हिंसानि बाना
हमदांस' हायै अन्याइनि बाना
सानस्त्रि गैयै मिना बाजार राजखान्थिनि बानाया
सुबुंखौ दै गब' होबाय;
बोरै हाबावगोन बेफोरनिफ्राय रैखाथि मोननो
हलाय जानाय नोंनि सोदोमस्त्रिखौ दाखांफिन्नो
आयु हनै जेथिंबो बाना आरो बाना । □

माहारियारिबाद

सानसेखालि आबौनि बिफा आयंआ
जान्था हेबैनो खोन्थानाय सल'आ
आंनि गोरबोआव फिर-फिर दंखाय
फिसौफोरनो आंबो थख'-थख' खिन्थाजोबबाय ।
फिसौ दैज्लाड बुंदों—
नोंबौनि बिफा आबौवा
गोथां जारिमिननि सल' खोन्थानाया
मिथिकेल सल'फोरजों सोरजिजानायसो नामा
किरात, असुर, म्लेछ, दानब आक्रिति लानांना
जुग नायै नायै भुग खालामनांनय ?
फिसौनि सोंनायाव बानबुंथाय दं
बिनिखायनो बर'आ स्नि रोजा बोसोर जोरना दं,
बोलोजों हाया सोलोजों नाजाब्लाबो
आखाइजों हाया आथिंजों नासयब्लाबो
रावजों हाया भावजों गादबब्लाबो
आगुनि बै सल', सल'बाथा आरो सल'मा
खन्थाइ, खन्थाइमा आरो जारिमिनारि सोरजिथाइ
गासैबो गोथां जीउनि फुंखा ।
नै फिसौ—
नोंमाइनि साइमनखौ लोगो हमनाया
हारिनि थामोनथानि बाश्रा बुंनाया
नोमफानि गेरेमसा हारि दानायनि सानस्त्रि सुजुनाया
नोंदानि उदां अखां नागिरना थुंग्रिजों जेना-जेना दावहा नांनाया

नों बुंनाय मिथिकेल, माइथंलजिकेल आरो लजिकेल
सानमोन्दांथिफोरनि मोनफा मोनफा बिदिन्थि;
खेबसे बिजिरना नायसाय फिसौ
गोदान मुगानि सानथौ माहारिआरिबादनि सानस्त्रि
आखुथाइ बे राव, हारिमु, थुनलाइ आरो आसारखान्थि ।
फिसौ, बरनि माहारिआरिबादखौ बिजिरसाय मेगन मिसिबना
नोमथैआजे बि एस एस आरो आबसुनि जुथुम्मायाव बुंदों—
गावनि फिसाखौ बिमानि रावाव सोलोंथाइ होनांगौ
गावनि हारिमुखौ जेरावखि थाइ लाखिनांगौ
हारिनि आसारखान्थिखौ जेखि अबस्थायावबो फोथानांगौ;
थामहिनबा,
रावा जौनि जीउमा
हारिमुवा जौनि बिगोमा
आसारखान्थिया जौनि बिमा
माहारियारिबादआ जौनि लामा । □

देरहासारनायनि फिरफिला

जेराव सैसोनाय दं बेवहाय देरहासारनाय दं
जेराव मावसोमनाय दं बेवहाय जौगानाय दं
जेराव सान्थि दं बेवहाय रंजानाय दं
जेराव अनलायनाय दं बेवहाय गोजोननाय दं
बेफोरनो मोनफा मोनफा देरहासारनायनि मोनथोर ।
जाय सिमां नुयो बे मोगथाडारिखौ सिनायो
जाय जेन्नायखौ गनायो बे देरहासारनायनि साबिखौ मोनो
जाय अनसुला बे नियाइनि बिगोमा;
हिंसानाय, मुगैनाय आरो फोलानाय
नासयनाय, गादबनाय आरो सोबखनाय
बेफोर गासैबो साफा-साफा नौनि बान्दा ।
अबं रामा लादोंब्लाबो अनजालि बिसि सिताखौ अग्नि परिक्षा
फोरजाफोरनि सिगाडव देरहासारनो हादों सैथोथिया
उन्दाहाजों दाहा नागारनांदों जोबनायाव सुबुंथिया;
इसोरनि आत्माया साथिनायखाय भारजिन मरियमनियाव
अबं होन्ना गनायहायैलाय सुबुड दोस्थाबदोंमोन कुसनि सायाव
सान्थामनि उनाव फोरमान होफिन्दों जिशु खृष्टआ
देरहासार जानो हामारदों थारैनो सैथोथिया । □

मेंरोडैः फाइखि

(प्रमद बरंखौ गोसोखांना)

नोंनि बानगोनां सानस्त्रि, मतथाय आरो जुक्विफोराव
खाथेनानै दोनजानाय रानज्रिं-ज्रिं सोदोमस्त्रि
जोबथेनानै दोन्नाय कफिननि जथाय जिनजिरि
हायाखिसै थावरिनो, गेवलांजोब्बाय फोर-फोर,
लाथाखानाय मुसुगुराबो गेवस्त्राबाय
रानखांनाय गुस्थिया सिदोमा जाबाय
मुगानि उनाव मुगा दिनैसो जारौ-रौ सानगोरलै ओंखारबाय ।
अम्बासि हरनि मेउ-मेउ फेसानि सोदोबाव
हथंसिरा बिमानि बिखा सौयै-सौयै गाबनायाव
मुंख्लं फिसाफोरनि बेगेड
सियालफोरनि बोस्लिंनायजों थिं-थं रिंनायाव
जानोहागौ नोंनि गोरबोआ थेर-बेथेर जादोंमोन
हज्रि-हज्रि सान्थि आरो खौसेथिनि बाश्त्रा बुंदोंमोन
दाहाजों मेंहाबना ओलैस्त्रि जानाय आइखौ आलो आलो फुथुनो ।
थारैनो नों जोहोलाव मेंरोडैः फाइखि,
आंनि सिलायनि बेरेल
फिनजाथाइ आरो थुंग्रिनि दाहारा
नोंनि गलाप बिबारनि फाइलि
अन्नाय, जौगानाय आरो लुखांनायाव हेव मानिबाय;
गमामायैनो नों देरहासार जामारबाय सना
हाब्रुजों गफबनाय फुखिखौ समायहोबाय

गावलां-गावथां बारसे फामे बिबार महरै बारना ।
नझ नाथाय बे बिथिनि मावनाया गोरलै
सोरबा सान्नाय बादि ओंखामजों लोंनाय दै,
बिनिखायनो, आंबो सिगांबोबाय नोंनि गोनांथियाव
खावलायो बयखौबो फै खौसे जानि हारिनि अलखदआव
दाहार्थोंसै सुथुरा खालामनो जोंखौ सै-सै । □

दाहा

हारिया जेब्ला जोबथा रुगुडव
हारिमुवा जेब्ला अलखदआव
रावा जेब्ला खैफोदाव
आसारखान्थिआ जेब्ला मिरौ-जिरौ थासारियाव
नोंबो आखाइ सुगारोब्ला
खुगायावल' माहारिआरिबादब्ला
दुखु आरो जेंनानि समाव सोरखौ लानानैथो सिगांबावनो ।
आं सहायनो हाया सना
सुथुरनि ब्लां-ब्लां सिनाय खुगायाव
हारिनि मनजाहां मनजाहां थासारिखौ नायना
नोंनि फुथिहां-फुथियाहां दाहानि फोरमायथिनायखौ खोनाना
बड'फानि मिनिखैरो-रो सावगारियाव हाब्रु सारफ्रावनायखौ नुना ।
नारजारी, महिलारी,
खाख्तारी, स्वरगियारी,
दैमारी, बसुमतारी,
गेदेमा आंगो हादुंगोराफोरा सेफ जनावल' थाब्ला
मोसा-लखा
दावमा-दावसा
सैमा-अमा
जोंनि थानसालिखौ ग्रिद-ग्रिद आवग्रिजोबोब्ला
गोदौनाय बालाहामाजों ग्लब मनजानाय बादि जाया होनब्ला ।
आंबो सानो नोंबादि बिखुं खालामनो
जेब्ला मेंनाय मोनो

आंगोजों सोंखारिजायो
नंखायावनो दाय होजायो
सैथोखौ नुब्लाबो फोलाजायो;
सान्नाय फैयो गावखौल' बासायनो
खैफोद फैब्ला
अलखदखौ नुब्ला
आनिखुइ गोहोगोरासिना होग्दावब्ला
मानोना, आंबोथ' नोंबादि मानसिसो सना ।
हाय आनान गसाइ,
मा एफाग्राब सोमोनांथाव नों सोरजिनाय बे बुहुमालाय
गोमो-गोजा बाथ'गां
गोजौ-गाहाय आजां-गाजां
सुबुंथिया नाथाय थैहां-बरबहां
गावबा-गावनि थाखायल' बयबो एवखां-सावखां
बेनिखायनो नामा आंबो जानांदों आन्दां-खान्दां ।
दहाय आफा,
अन्नानै निमाहा होदो जादोंब्लाबो जोंनि गोरोन्थि
बिखा फोरदान्ना लागोन आं नोंनि गासैबो साजाखान्थि
खेबसेल' अनसायबावदो जाफिनथोंसै बर'आ बयनिबो बिदिन्थि । □

फागुननि आबिर

थु साला, होथार

हाद्रि खुग्लुं-खुग्लुं सेमब्रेलायनाय होथार

नडबा, मोनगौ जागौमानि सान हाबलायलायगोन ।

बावद्रायब्ला न'आवबो रायजोफोरा खायसो खालामलायगोन ॥

नाड बानायसो, (अनजालिया बुडे)

सोर माब्ला नोंखौलाय खालामलायखो खायसो

थेनो फैयाखै, रंजानोसो फैदों ।

सम गैयाब्लालाय मानोथो फैलाबायदों ॥

नों बहा मोनथिनो सना (आं गोसोजों गोसो बुडे)

नोंखौ लानायनि सिगां दंखायोमोन आंहा सासे खैना

गोबां बोसोरनि उनाव जों सानैजों लोगो लालायगोन ।

खौरां होलायखानाय बादि फागुननि खन्थाइखौ सोलाय-सोल' खालामलायगोन ॥

सान्नाय जेरै मावनाय एरै

दुम्फेयाबो नेना दंखायोमोन हाथाइ एरै एरै

अनजालिनि नोजोरनिफ्राय आं एरखेनो हायाखै ।

आयखां-बायखांजों गोसोआबो जथेराखै ॥

साउन्द सेटनि रिंनायजों मावरिया हाजोआ गोमसारलायदों

गोदान मुगानि सेंग्रा-सिख्लाफोरा हाइलालाय हुइलालाय मोसादों

फाग्लिया दिनैबा मा जादों हारांगि-गि नांजाब नांजाब ।

ब्रैजि बोसोरनि उनाव सानदोंमोन आंसो दुमफेजों थाजाब थाजाब ॥

गालि बिमायालाय बोरैबा मोनथिबायसो नामासै

आंबोथ' नाजाब्लाबो दुमफेखौ बावगारनो हायाखै

बोसोरनि खेबसेया गोसोआव फैथारो लावखार ओंखाम जानाय समाव ।

बोरैथो बावगारहानो सानसे लोबहाबदोंमोन बिनि अत्रायाव ॥
बैथिंलाय मा नायहरदों (अनजालिया दाद्रियो)
ओंखाम-ओंखि मोनजोबबाय होनहरदों
नुवाखै, लंपेनाव गय खदै नांजोब्बाय ।
आयु फागलासो,
लाजिना आंहा दै गबनाय मावजि बादि खांसेव-सेव जालायलांबाय ॥
आं जेनमारबाय दुमफे
गोरबो इसिडव रिंखांफैदों नै नोंनि दाहानि गाबनाय फु-फु, फे-फे
समायखिरा लाखाबाय अनजालिनि खर' दांन
(अनजालिनि खर'खौ बिलिरना) ।
फैगोन जोनोमाव
फागुन दानाव
लावखार ओंखाम थिलियावनो हाबा लागोन होनना ॥ □

सदबांसा

आं दंबाय दंखायो नोंखौ नेनानै
दुफावलु जोमैनि आरांगायव जिरायनानै
बोसोर आरो मुगा बाबेनब्लाबो सानसेल' सान्नानै
थैजों लिरनाय बेसेनगोसा नोंनि लाइजामखौ फोथायनानै ।
जेब्ला आं हरखाब नोंखौ नागारबोदोंमोन
थैजों सिगलाबनाय आंनि गोथै देहाखौ नों बिलिर बिलिर गाबदोंमोन
दागाब-दागाब, दाहा दाखालाम
नै नोंनि खाथियावनो दंबाय दं आं बुंदोंमोन
नाथाय, नों सैथोखौ मोनदाडखैमोन ।
बा ! मा एफाग्राब फारागथि
नोंजों आंजों अनलायनाय आरो नोंखौ नागारबोनायनि बुब्लि,
अब्लाबो, बावगार हायाखै अन्नाय नोंनि गुलि-गुलि
बिनिखायनो, सान्दोंमोन जानो नोंजों जुलि ।
नोंबो फैमारबाय सना,
आंनि मांखराव नों हरफानाय सनानि आस्थामा
नै गोरबो मैखुनाव दं दाबो खानानै लाथा
जिरायदो दे, थिनानै दोनखादों आं गोथारैनो गंसे सनानि आरांगा ।
नोंनि बाइफ्लेनाय गोरबोखौ मोनदांनानै आं गोमोदोंमोन । □

दाइया सोरनि

स्नि रोजा बोसोर राज्यो जाबोनाय
रोहो-रोहो जोंगा-मागा गेरेमसा हारि
जगतगुरु, दाउहारु, बिगोमा नों बिफागुरु
मुंदांखामोन, सलन्थाइमा रामायण आरो महाभारतआव
बेद, पुराण आरो उपनिचदफोराव ।
जारिमिन सोरजियाखै होनलाय
हिरिम्बा नों गावनि हायना महरजों
पाण्डबनि फिसाज्ला भिमखौ बमब्रायना,
नोंनि अनजालु घटत्कचआ कौरबफोरखौ दावहायाव मलथायना ।
नोंनोथ' नारखोबुदां
थोर-थोर गियोमोन आरो होयोमोन मान
सोरगोनि मोदाइ-दावदाइ
आरो फातालनि दानब-असुर,
हरसेनि गेजेरावनो लुखांदोंमोन कामाख्या बाथौ थानसालि
सारिजाफैदोंमोन देबि सिता नोंनि सान्थिनि सामराज्योआव,
बा-बा, नोंसाज्ला भगदत्तआबो एसेल' नंथारामोन
पार्तिनि जेन्नायाव कृष्णआ लाजिना सोलो बाहायना सिथारनांदोंमोन ।
गोजाम मुगानि सावगारिखौलाय नों आलदायै लुखांखादों
भास्कर बर्मननि भास्कर्जखौ नुना हिउयेनसांआबो सोमोहाबदों,
नेपालनि राजा नैथि जयदेबआ नोंसाजो राज्योबतिजों बाथौ धोरोम दिक्षा होजादों
गोथार खेराइसालिबो गायसन्दों,
नोंनि जोंगा-मागा आरो गोहोखौ नुना हर्षबर्धनाबो बिसिगि खादों ।
गेजेर मुगानि नुथाइयालाय बुंजाखाया
जौयेनजों बोहैख्वायबोनाय बुरलुंबुथुरा
दैब्रां, दैस्त्रां, दैखं, दैहं आरो सनास्त्रि
आलो-आलो जेराव नों आबाद मावोमोन

नडमोन जेनिबो हाथासि,
 बेदरनि आलि
 जौनि फुखि
 ओंखामनि आखाय
 जेथिंबो सान्थि आरो सान्थि ।
 उप, गोदान मुगाया फैयामोनब्ला
 जानानाय नडमोनखोमा साफा दाबफा,
 ना, थासारिजों खारफानो रोडाखिसै जाना सावख्ला !
 अखां नांगा-नांगा गेदेमा बे हारिया
 जानांबाय दिनै मुस्त्रि सिंनि थाम्फै,
 मुलुगनि सुबुंनो ज्यतिषि बिद्धा होगिरिया
 दाहाजों हुगारनांबाय मेगननि मोदै ।
 दाइया सोरनि आबौ ?
 नुमलिगर हाजोनि
 नों लिरलांनाय अन्थाइ खाम्फानि जारिमिन
 हायाखिसै सिनायनो,
 जाखोसो नामा आगर-आखाय;
 थामहिनबा,
 आजै-आजौनि होलांनाय आसारखान्थि
 गोदान मुगानि सोलोंथाइ फारिखान्थि
 मोननैनि बबे मोनसेया
 गोजामखौ नागारना गोदान्थिखौ नाजावनायनि
 ना, गोदानखौ गोबाना गोजामथिखौ नेवसिनाय ? □

गोसोनि दावहा

मोजोमसे सोलेर

मोनसे जीउमा

नाथाय, गोबांथार सानमोन्दांथि ।

सैथोआ बुडे—

नंगौखौ संदान आरो आवगायलां

सुबुंनि बे बनजार,

असैथोखौ गोबागोन, दान्दिसेनि राजा जागोन

समनि बिथिडव आन्दायनांगोन

दान्दिसेआवनो हिर'निफ्राय जिर' जागोन ।

अन्नाया रैखाथिनि थाबसि

हां हां रागानि बिजावजालि,

मोजां-गाज्जि गिदिर-उन्दैन अनजालि

नाथाय, अबंलावरिया बुडे—

अन्नाया सनानि साबि

रागा, मुगैनाय, हिंसानायनि बाक्सुखौबो हायो खेवनो

रोमोलांनाय जीउमाखौबो हायो लुखांफिन्नो

उन्दुयो निजोमै आलो आलो ।

सुबुंनाव सारिजायो मोननै खान्थि जेब्लायबो

गाहाम आरो गाज्जि गोरोबलाया माब्लाबाबो

बादायलायनायाव समब्रा-समब्रि सानैबो

जोबनायाव गाहामनि देरहासारनायानो जुगामि

जेन्नांना आनिथानि जानाडे गाज्जि सानमोनदांथि ।

दावहाखौ सामलाइनाया सोनारो बिबेकनि सायाव
इउननि बिथिं सुंघिनायाबो सोनारो थार सान्नायाव
गाहाम सान्नाय आरो मावनायनि फिथाइयाबो गावनि सायाव
बिनिखायनो,
थार, सैथो आरो न्याइआ अराइ जोरथि
रोजा जेंनाखौ फेजेन्नानैबो हागोन जानो बिगोमा बिनि। □

बुब्लिनि दावहा

हे आफा आनान गसाइ
मोनथिया बे नॉनि मा गेलेनाय,
गाबनाय मिनिनाय
सुखु आरो दुखु
जेन्नाय देरहानाय
थैनाय आरो थांनाय
नोंनि बिसारसालि बे गुवार दावहा थिलियाव
मोनगोन बोरै नियाइ आरो अन्याइनि बिजिरनाय!
दावहा आरो दावहा
मुलुगनि फारफ्रोम खनानिफ्राय रिंखांदों दावहानि साइरेन,
खायसेआ दावहा नांदों गावनि थामोनथानि
राव, हारिमु आरो थुनलाइखौ जुगामि फोथांना लाखिनो थाखाय;
सोरबाया बारसोमदों जीउ आरो सम्पदनि रैखाथिनि
बिमा-बिफा आंगोफोर आरो हादोरखौ रैखाथि होनो थाखाय
मोनथिया बिफा नोंनि बे मा नायबिजिरनाय ।
गोहो गोरया गोहो गोलोन्दांखौ सोलिनाय
अन्याइया न्याइखौ मेहेरनाय
दुखुवा सुखुखौ फोलानाय
रागाया अन्नायखौ गादबनाय
असान्थिया सान्थिखौ नासयनाय
बेनो नामा आफा दावहानि आखुथाइ ।
आलावरि बिलावरि गाबदों आफा बर' हारि
आद्रि जाजोबलांनोसै खैदां-खैफोद फारि-फारि

गियाननि दावहायाव

सरैखानि दावहायाव

राजखान्थिनि दावहायाव

थामोन्थानि दावहायाव

जेनमारसिगोन आफा बर'फोरा फिरि-फिरि ।

बिमा माइनावाबो जानगारलांबाय बेरेदनानै नुना जोंनि आखुथाइ

बुब्लिनि दावहायाव बारसोमनानै बावगारना बिनि अन्नाय

आसिरबाद गैयै रानस्त्राव-स्त्राव बरादनि बिगुमाल' जाना

मेंहाबनाय सोरलिं-लिं देहाजों हान्थिनो जाबाय हाया-हाया

फोसाबफिन्दो आफा इसिंनि गारायखौ

बाथौसालिनि गोथार आलारिबाथिनि थावजों

लुखांफिन्थोंसै, अराय हास्थायनाय मिजिं गावनि आखाइजों । □

बाजै सरला

(गांसे लाइजाम)

दाखालि बैसागुआव

आं दामनाय ग्रिमबा-ग्रिम खामनि गोमनायाव

बाइदेमलाय-सिदेमलाय नॉनि मोसानायाव

लाजिगुसु बैसागि सिख्ला आरो बारदैसिख्लामोना

हाइला-हुइला मोसानायखौ गोसोआव दंदा बाजै सरला ?

गुफुर खाखोरनि सायाव लिरनाय जिख्लाबसे बे आंनि लाइजामा

बाजै, नॉनि गुफुर-गावदां बिखानि फुतुखा-फुतुखि सबाय बिमा,

ब्रैजिनि देवना बारजासे जॉनि गोसो थोलायनाया

बेसेबांबा आमथा-आमथा

रानस्त्राव-स्त्राव फागुननि बोथोराबो फोरान्नो हाया ।

आंनि खावलायाव नॉनि लिपस्टिकनि दागो हुगारनाय रुमालखौ

जेथो दाननि अखा दामब्रायाबो हानाय नड्ड बाजै सुगारनो,

अहाया-अहाया उन्दुथाबो सिमां नेयैनो बेल्थाय-बेल्थाय गान्दुखौ

नंमारगौ बाजै जॉनि गोसो थोलायनाया अमृत सागोरानो ।

बाजैलै;

बैसागु सनायजों, दाउ खौवौनि गाबनायजों

एवखां-जावखां जानाय गोरबोनि एग्लुंनायाव

गोसोआनो जवा-जवा जाथारदों मावनाय-दांनायाव

गोरबोनि नमा, मिजिंनि जिनजिरिया

सिमांफुरिआव लुनाय बालानि न'सासो जासिगोन नामा सना !

जखायनै बोसोर सिगां,

गाम्बारि-सम्बारुआ हाबा जाना

बैसागुखालि थाखोमा थाखोमा जोंखौ मिनिनाया

आंनि गोसोखौ खायसिब-सिब खालामथारबाय

नों गनायोब्ला देग्लायनो लाबोनो आं सानथारबाय । □

थां आरो थांनो हो (बड'फाखौ गोसोखांनानै)

आं थैब्लाबो नों थांनानै थानांगोन
लामानि सुग्रेखौ बोखारनांगोन
सुथुरनि जाखर जाखर मेगन
दावखा-सिलानि सोफै-सोफै महर
हुरलुं-हुथुं बारायनाय बुरलुंबुथुरनि फाखन
बैफोरखौ एरखेनानैब्लाबो नखरखौ बासायनांगोन ।
बोथोर गोरोब गोरोब आबाद माव
खाबु लायै लायै जिलिर गाव
बारदैसिख्लाया आबादखौ संहारगोन
एन्जर दांसलियाया बिदांखौ अरसगोन
बिमा माइनावा दुखुजों दाहा गारनांगोन
नडाब्ला, जोबनायाव जानांगोन बुगाव-गाव ।
आं गाइनाय बिफाडव सानफ्रोमबो दै-हासार लुबाय था
दैज्लां बोथोरनि लेवा-बेन्दोंफोरखौ एवसांबाय था
बेनि सायख्लुमा नोंनो जेब्लायबो थाजिम होगोन
बेनि फिथाइखौ जाना थांना थागोन
इउन जोलैनो जुगामि लामा दिन्थिगोन
नाथाय, जोबसांगोन नखरा नों सानोब्ला गावनिल' आनथा ।
आं लुनाय ननि नों दिनै बिगुमा
नसुंसेनि नोजोराव आंनि थाखायनो नों आगोमा
सुखु-दुखुआव बयजोंबो बाहागो लाज्जाय

जा दं रात्रानै जा मोखां नायज्जाय-नायज्जाय
 मोनथोरा मोनसेल' बेनो जादों अनज्जायनाय
 नडब्ला, खैफोद समाव गाबनांगोन बोना गोलाव हांमा ।
 फुरनिमा-अमाबैसाया गावनो-गाव फैबाय थाखागोन
 सुखु-दुखुआ आमाय-जिमाय गेलेफलालायखागोन
 दुखुनि समाव बिमा रावा नोंनि थापसि फिथाइ
 सुखुनि समाव आयना महरै हारिमु गान्नाय जोमनाय
 हारसिं दाला, फोरों गुबुननोबो हारिनि दामनाय देनाय
 रोजा सुथुरनि खैसार थाब्लाबो गोरलैयैनो नों देरहाफलायगोन ।
 नों सानदोंब्ला, गुबुना नोंखौ नासयदों
 गावनि थाखाय नोंबोथ' आंगोखौ फोलादों
 थामोनथानि दावहायाव आइनि मेगना दाबोनो सिदोब-दोब
 समनि दावहायाव जानांबायसो नामा नोंबो जोदोब-दोब
 आंगो होनना सोरखौ साननो बयबो नाथाय माखोब-खोब
 बिनिखायनो गोथार बाथौसालियाबो खालाय जानांदों ।
 नों थाब्लासो गुबुनाबो थांना थागोन
 सुबुंथिनि सावगारिया रोखा बेरखांगोन
 आंनि आखाइखौ हमनो मुगैब्ला
 देरगानायनि थाखाय आसु-सु जायोब्ला
 नखर दाखांनायावबो रेखा थायोब्ला
 हारिनि मोक्थाडरि बोरै लुखांजागोन । □

गेदेमानि मांखरसालि

(मोजोमसे बिबार ब्रजेन्द्र कुमार ब्रह्मनो)

नों उन्दुनाय बे मांखरसालिया
जानोहागौ दखरसे गोथैसालि
सुबुं महरै मोनसे सोलेरा
आनज्राय लांखागोन आखुथाइ मिथिंगानि
आलादाथि दं नाथाय सरासनस्रा ।
गेदेमा,
आनि बिबेकनि मेगनाव
जाखांफैदों सावगारि
नोंनि उदां अखांनि लांगोनायाव
खांखोर फिसाफोरनि नागिरनाय थरथिनै अमृत
रोहो रोहो खामनाय उदैखौ सुग्लाइ होनो ।
आयु हनै; मा एफाग्राब दुखुनांथाव सावगारि
स्नि रोजा बोसोर रायजो जाबोनाय आबौ अरगामोना
खासिनि गात्रानै उन्दुदों दाबोनो नाडागोजोनै
गुबुनफोरा थियारि अखाफोराव नबथि नागिरनानै
नोंनि फिसाफोरा आद्रि जासिगोन नाथाय उदै हुगारनानै ।
मोनब्रै बर्णनि गादबलायनाय आखुजों
गासिनजानाय बै सावख्ला फिसाफोरखौ
आखाइयाव हमना ददिं ददिं हाया हाया बोनायाव
नोंनि दाफनाखौ अन्थाव बाथाव मेंरु-रु नुदों गेदेमा ।
अब्लाबो खाफालनि रेखायाव जेन्नाया बेरखाडाखै ।
हिरंसिमा आरो नागासाकिनि गोथै हाथफलायाव
गोदान जीउनि सोरगो रायजो लुखांनाय बादिनो

दावहायाव जेनग्लिबाय थानाय बर' फिसाब्लाबो
 थैलांनो गोसो गैयैखौ नुनानै दुबगाखांनाय मोनबाय आं ।
 आंगोफोरनि थिफुदला राव आरो जाखर मेगननि मेहेरनायाव
 दाबोरसेनि थाखाय नों थनथ्रनो गोनां जादोंब्लाबो
 नोंनि दाहानि ब्लाव-ब्लाव जोंनाय अरनि दुंखावनायाव
 थोरफो-थोरफो गलिलांजोब्बाय ।
 नाइहरसाय गेदेमा,
 बिसोर नोंनि अत्राय आरो हेफाजाबनि आखाइ फोलावहरदों ।
 सानथ्रहायै बेले-बेजे सानस्त्रि
 गोनो-गोथो गुरलाय-गुरजाय जेंना
 मेंहाबनाय देहाजों ओलैस्त्रो उन्दुस्त्रिबाय नों
 मिनिख्रैरो जाबाय थानाय फारनै गुस्त्रिखौ खबजबना ।
 आंथ' सानो, उन्दुस्त्रियाखै नों जिरायदोंसो ।
 नों मोगा-मोगि जानाय गुबुंले बारा
 गोदना सथे सथे खालामनाय बिषनि फिथाइया
 मैला आथिंजों गासोमनाय गेन्दा जानाय गोथार दैआ
 थारैनो नोंनि जीउमाखौ सान्नायनि गुथाला बुसोमब्लाबो
 इउन जोलैया बावगाराखै गेदेमा, गोसोखांप्लायबाय थायो अरायबो ।
 नों उन्दुनाय बे एमनि सोरगिदिं
 फिसाफोर नोंनि नै ज' जाफैदों
 दाव खौवौनि मोदैखौ हुगारनो साग्रिदनो
 उनदाहानि थरथिंसे मोदैजों नोंनि आथिंखौ सुनो आवगायदों
 जेन' जो हायो नों हास्थायनाय उदां अखांखौ सोरजिनो ।
 लुखांनो बाइदि गाबनि समायना बिबारबारि । □

गेदेमाफोरखौ संदान्नानै

गेदेमाफोर,

नोंसोरनि सानस्त्रि, मिजिं आरो थांखिया

गाब गैयै आरो बेसेन लायै त्याग खालामनाया

बुब्लिनि हाद्रिजों हारिनि थाखाय दावहा नानाया

दासान सनाफोर हलाय जागोन मोफ्लामगासेयाव ।

समनि फान्जारियावसो जाखोना सुथुरनि खैसारावसो जाखो

खोमानांदों नोंसोरखौ सा-ससेयाव

दिगहारा जानांदों लामा ससेयाव

दावखा-फेसायाबो मिनिगलाबदों जोंनि हालोदाव

दुखु-दाहाजों हायाखै नायहरनो अख्रां सायाव ।

नाथाय गेदेमाफोर,

जों दा गांखं राबाय

गावनि आथिडव गसनो हाबाय

ग्लबेलिज्मनि दाहाराव सं दानै दानै आवगायनो रोंबाय

सोबखंजानाय, नासयजानाय आरो गादबजानायनि जाहोनखौबो हमदांबाय ।

राजा फेरेंगादाव जाना नोंजे जोंखौ फोजादोंमोन

अमागादि लाना दा उन्दुस्त्रि बुंदोंमोन

नायगंना दाथाबाय होत्रा थोन्दोंमोन

बेफोर आखुनि थाखायनो जों लोरबांमोन ।

नोंसोर सोरजिना गालानाय बै सम्पतफोरा

इउन जोलैनि दोनथुमसालि जाना थागोन

गोरबो इसिडव जुगामि मासि मोनगोन

उदां बरंनि अख्राडव अलंबार जाना जोंबाय थागोन

आइराखि गराइ जाना अरायबो दैबथिंगोन,
गेदेमाफोर,
जोनि बिबानाबो नोंसोरनि सानस्त्रिखौ लुखांनाय
इउन जोलैखौ बिथिं दिन्थिनाय
सुहाबनाय गोरबोखौ लुखांफिन्नाय
थफा थफा बनजार जाना नोंसोरखौ संदान्नाय ।
हाजार जेंनाखौ सोरखिना आवगायलांगोन सिगांफारसे
खैफोदनि समावबो नोंसोरनि मुडववो गसंथागोन जीउ जोबजासे । □

गोदान गामि

फै जों गंसे गोदान गामि लुखानि
गय नारेंखल सारि सारि
थाइजौ खान्थाल लारि लारि
बाइ बाहागि ग्रोम ग्रोम
जेराव दं गोजोन आरो गोजोन गोजोनल' ।

फुंजानि मोदोमफ्रु बिबार बारगोन
खौवौआबो मिलौहाब देंखो बोगोन
दाव थेफालिया थेब-थेब थेब-थेब आखाइ हमना मोसागोन
बिमा माइनावआ खानाइ हगारसारना बाथौसालिआव आरज गाबगोन
हे आफा आनि फिसाफोरनिसिम नौनि अननाया थाफ्लाइबाय थाथों ।

दुबुलिबारिया सना गाब माय बिदांजों समायफ्लेगोन
बिनानावनि खेलथें-थें खेलथें-थें माखुनि सोदोबजों
रांखान्थिनि जांखिथाइ फैगोन
नुहरनानै जौगानाय आजै आजौआ सुखुनि मोदै सख'गोन;

दोबैनाय नड्ड साना मालाबाबो जौनि गामियाव
खेन्दासे मायरनि हांमा सुरनाड्ड रावनिबो नखराव
सावरि बादालिया रोहो रोहो
जानाय नड्ड गावजों गाव सोखो मोखो
मानोना लिरखानाय थागोन जेराव समाजारि आसारखान्थि
फै जों गंसे गोदान गामि लुखानि । □

अर

अर,

जेथिंबो ब्लाव ब्लाव अर आरो अर

सानजाथिंबो अर

सोनाबथिंबो अर

साहाबो अर

खोलाहाबो अर

राजखान्थिनि अर

रांखान्थिनि अर

धोरोमखान्थिनि अर

समाजखान्थिनि अर

गेदेरसा-उन्दैसा, बोरायसा-बुरैसा

बयनिबो खुगा-खुगा अर आरो अर ।

मानिथो अर जाखोदा !

आबौ दादुरानि बिरि खान्दाजों खामखांनायसो नामा बेलाय

ना, हासुमुत्रि बाजैनि गान्दौला सावजानायाव खामखांनायसो फालाय

जानोबा, राजा-बाबुमोननि खाजि एवनायनि अरखि बेरफ्रावनायनि जोंखांनाय

नडाफा ?

आदा दांदुलाया बर'खौ खृष्टान, बाथौ, ब्रह्म, सतसंगि आरिआव बोखावबाय

आदुवाफोरासो खौसेथिनि थाखाय हांखुर जानांबाय

रोहो-रोहो खामनाय धोरोमनि अरा बर'खौ दुफु-दुफु हाथफ्ला खालामबाय;

बिनिखायनो,

सासे रथि देबिनि गोनांथि जादों,

गंगानि लथासे दैजों हाथफ्लाखौ सुग्लायहोनो

सिग्लि सिग्लि कामदेबखौ दानाय बादि हारिखौ दानो ।
 राजखान्थिनि ब्लाव ब्लाव अर जोंदों
 फागुननि बाराव दाय गैयै बिफांफोरखौ
 अरनि सालाइया ख्लाब ख्लाब सोलाखोदों,
 बोथोर सयैआवनो एम्बुफोरा अखा लिंहरदों
 हागोन्दा खोमोरनो अरखौ अखा दामब्राया !
 समाजाव बयबो होन्दों जोंहा खौसेथिनि गोनां जादों
 मोनथिया नाथाय माबे खौसेथिनि अर जोंदों
 राजखान्थिनि, समाजखान्थिनि, ना धोरोमखान्थिनि ?
 औ गमामायैनो खौसेथिनि गोनांथि जामारदों ।
 गोदौनाय लाभाया खामग्लिबाय आंनि गोरबोखौ
 जौ, जुवा, द्रागसजों बुंफबनाय लांगोनाया
 खु आखुथाइजों गेना जानाय आंनि नखरा
 गुबुंले उखुन्दैजों बेंफबजाबाय
 हाबाब गसाइ, अर हनै जेथिंबो अर । □

आं बर' गोदान मुगानि

आं बर' गोदान मुगानि
रोंग' राग' नैजिसे जौथाइनि
मेलेमनि दावहा
रेबगननि दावहा
दाहाल-थुंग्रियावबो आखाफाखा ।
नों सोंखारिदों ?
मिनि मिनि इतिकिं खालामदों,
फाप्लि बुज्राव बुज्राव बाखायपलादों;
हुमनि गाहाइ खामप्लायखौ आवग्रिना
राजानि गाहाइ बोसोनगिरि जाना
गोदो मेफबनो हानायखाय आंनि आगु जोलैखौ
दाबो आदुवासो सानो फंबाय बिनानावखौ ।
बुहुमनि जौसिन आरो साबसिनखौ आंबो सिनायबाय
अमागादै नड मायब्रा जौनि फालांगिरिसो जाबाय,
दानाय-लुनाय हेबनाय-मावनाय
आगर-आखाय गात्राय-जोमनाय
फिसियो आं दाव-अमा मोसौ-बोरमा
आखाफाखा आं जेरावबो रोंखा राखा ।
गैयाब्लाबो जारिमिन मुलुग बिखायाव
आबैन सल'आनो थोजासे आंखौ सिनायथिनायाव
नों दोनखोमाब्लाबो
नों हुखुमोरब्लाबो
नों गाखोमोरब्लाबो

दैमा-दैसा हाजो-हाला
बेद-उपनिचद सलमा-सलन्थाइमा
खाम्फाबादि बेरखांखादों आजै-आजौआ ।
आं बर' गोदान मुगानि
नछ गेजेन सोरबानि
सोलेरनि थरथिंसे थै थासान्दि;
रोजा बारहुंखा सारन्थाइ
लैथो-लैथोमानि फैलासेम फैब्लाबो
खालामा आं आइखौ आनिथानि । □

आं फावखुंगुर, दिन्थिगासे फावथिनानि

अबंनि सोरजिथाइ

बेसेबांदि सोमोनांथाव

गुफुर-गोजा, गोमो-गोथां बाइदि गाब;

मिथिंगानि जिबनचक्र

सोलायनायानो सभाब

बिफां-लाइफां, जिब-जुनार, दैमा-दैसा ।

लामाया डजि कि.मि. गोजान

आगानफ्रोमबो जिरायाजासे फावथिना आरो फावथिना

बाइदि गाब आरो बुब्लिजों गोरोबनाय फावथिना

अलसिया बिफानि थाखाय हथंसिरा फिसाफोरा उखैनांना गाबनायनि

फावथिना,

गियानि सुबुडा इउन दानायनि फावथिना

गोहो गोराया गोहो गोलोन्दांखौ गादबनायनि फावथिना

अन्याइया न्याइखौ सोलैनायनि फावथिना

समायनाया समायैखौ मिनिनायनि फावथिना;

बेफोर गासैबो फावथिनाया अबंनिनो सोरजिथाइ

आलासि जोंबो नाथाय साननैसोनि थाखाय

सुखु आरो दुखुनि भागि जाफानायनि ।

आंनि गिबि फावथिनाया आइनि बेरेखा आहार ओंखारैनि खुद्रिनाय

जानोहागौ दैस्त्रां स्त्रां आहारखौ नारा नाथा दौसोमदों आइया

सोर मोनथिनो गोरोन्थिखौदि आं सहायनो हाया । □

आं बर'लेण्डनि दैमा

बैसोमुथि बिमानि गोरबोआव सोमजिनाय
बर'लेण्डनि आं खंसे दैमा
मुड्ड आंनि धोनस्त्रि, मानास, संकच आरो ननाय
बिनिखायनो, अराय मोथांखोर जोंगा मागा
बिमा बर'लेण्डनि मोखाड।
आंहा सानश्रहायै दालाइ, जाम्फै, निज्जा आरो फुंखा दं
सानस्त्रिया आंनि मिथिंगाखौ मोथांखोर खालामनाय
जिबनो जीउ आरो आहार-दै जगायनाय,
फोरोंथाइ आंनि मोनसेआ मोनसेखौ सुंसनाय
आलारि बुब्लिआव जुगामि सान्थि गायसन्नाय।
आंहा रावनिबो सायाव हिंसानाय आरो मुगैनाय गैया
आंखौ बयबो गोसोबादि खालामनो हायो
गोसो थोया थोया लोंनो हायो
अहाया अहाया लोहाबनो हायो
आग्लाय-बिग्लाय बाहायनो हायो
राना, जामा आरो थुंगेनायबो गैया।
बोथोरनि दाथाय आरो सोलायथायाबो आंनि सायावनो
जिबनि life cycle आबो आंनियावनो सोनारो
मिथिंगानि मिरु थावनियाबो आंनो
गोजोन, सान्थि, अहिंसा आरो नियाइनि बिगुमायाबो आंनो
आं बर'लेण्डनि खंसे दैमा। □

आंनि आफा

आंनि आफाया सासे बिफा
बयनिबो गिबियाव बियो जोनोमगिरि
नैथियाव दिथागिरि
थामथियाव बोसोनगिरि
ब्रैथियाव दैदेनगिरि
बाथियाव लोगोरि ।
बिनि गोथार आत्माया साथिनायखाय
आइनि आजोलि गोरबोआव आंनि जोनोम,
आफानि सिख्लाय अरसै मोज्लाय अरसै दिथा होनायाव
देर-देरखोन देरनाय आंनि हालोद,
बिनि आसि थुनाय थुनाय बोसोन फोरोंनायाव
जाबाय आब्रुथि गोनां सोदोमस्त्रिनि फाइखि,
आफानि हेवमानिरोडै दैदेनगिरिनि आखुथाइयाव
संदानबाय साहसि आरो मुखियाल जानो,
आफानि लोगोरि आरो आरजाथाव गोरोबथाया
फोरोंबाय दायगैयै आरो अनसुला जानो । □

आंनि हाबिला

आंबो मिनिनो लुबैयो रंजा-बाजा
हाबाथिलिनि देलेसा-देद्लासाफोरबादि
नाथाय, आंथ' आजोला नड।
आंबो रायज्जलायनो लुबैयो गगाब सिगाब
मुलुग दरबाराव टाइ-शु गानना
नाथाय, आंथ' फावसालिया नड।
आंबो धोनि जानो लुबैयो जोंगा-मागा
संसारनि दावगालु सुबुंफोरबादि
नाथाय, आंथ' लांसुनिया नड।
आंबो खानो लुबैयो फिसाखौ दाव-दाव
मेंनाय आरो फेनाय गैयै गंसे सनानि नखर
नाथाय, आंथ' अन्थाइ बिखा नड।
आंबो सानो मोनसे गुफुं समाज दानो
जेराव दं सान्थि आरो सान्थिनि रादायल'
नाथाय, आंथ' अहंखार नड।
आंबो सानो हरै मारुआव गंसे नबथि लुहैनो
जेराव मोनो गोजोन सुदेम आरो रंजानायल'
नाथाय, आंथ' लुबैसुला नड। □

जीउनि मिजिं

आं खन्थाइगिरिमोनब्ला
खन्थाइ सुजुगौमोन
रुजु-रुमु रायजो जानायनि ।
आं थुनलाइगिरिमोनब्ला
बर'नि जारिमिनखौ थुनख'गौमोन
हारिनि सावगारिखौ दिन्थिनायनि ।
आं देंखोगिरिमोनब्ला
देँखो रुजुगौमोन
रंजालि बैसागु बोथोरनि ।
आं धोरोमगुरुमोनब्ला
धोरोम फोसावगौमोन
सान्थिनि लु आवथायनायनि ।
आं राजखान्थिगिरिमोनब्ला
खौरां बुंथिगौमोन
नियाइनि हाबा मावनायनि ।
आं दावबायारिमोनब्ला
गोथार थावनियाव दावबायगौमोन
गियाननि बाश्त्रा फोसावनायनि ।
आं सान्थौगिरिमोनब्ला
गोरोबलायैनि जाहोनखौ बिजिरगौमोन
हारिया खौसे जानायनि ।
आं मेन्दा लावखार जानायमोनब्ला
बर'खौ दैदेनगौमोन

हारिया सुथुरनि खैसाराव गोग्लैयैनि ।
आं गियाननि थान्दैमोनब्ला
मुलुगाव गियान फोस्त्रावगौमोन
बरनि खाथियाव बयबो हेव मानिनायनि ।
आं वेचिचमोनब्ला
साहारा बालाहामानि
गोजोनग्लाय होगौमोन गांहाबनाय जिबनि ।
आं फोरोंगुरुमोनब्ला
आखल सोलोंनायनि
फोरोंगौमोन गोदान जोलैखौ गेदेरखौ मान बाउनायनि । □

आरज

हे आफा अबंलावरि
गाबज्जियो जों आलावरि बिलावरि
लाबोफिन्दो नों जोंनि खौसेथि
जालांजोब्बाय फिसाफोर आलाय-सिलाय नोंनि
जलांबाय खौसेथिनि बान्दो आनि थानि
गाबदोंसै हनै गोदान जोलैया खुद्रि खुद्रि
बिनिखायनो गजबदो, जों नोंनि आंगोथि।
आंनि आखाइनि रानथाबनाय आंगोनि थैया
गात्राय जोमनायनि गाबगोनां दागोआ
गोरबो इसिंखौ मेंगाया मेंगाया खालामब्लाबो आफा
आंनि थाखाय दाखालामसै फिसाफोरखौ सैया सैया।
फिसाफोरनि दाहायाव खेराइसालिनि दामजुआबो बबा जाबाय
आइ दौदिनियाबो गाद'-गुद' सन्द खोमानांबाय
आफा जाराफागलाया थिवरिया महर लाबाय
रुजुफिन्दो आफा अबंलावरि सन्दखौ बोखांफिन्दो।
दहाय आफा सोरजिगिरि
आइनां सोरजिनां नोंनो जोंनि रैखागिरि
गोजामखौ बावगारलायना थानोसै सिरि सिरि
अनज्जायनाय गोरोबज्जायनाया फैफिनथोंसै फिरि फिरि। □

आं चित्रलेखामोनथाय

आं चित्रलेखामोनथाय—

गोदान सावगारि बिलिरगौमोन

इउनखौ सुजुना जीउनि बिथिंखौ दागौमोन ।

नायखांगिरिफोरा फोरमायथियो सुबुंखौ नायनानै

ग्रह, नक्षत्र, रिंगा, सान आरो दानखौ नायबिजिरनानै;

जारिमिनगिरिया सेबखाडे जाखां बिदिन्थाखौ सोनारनानै

अन्नाय, दाहा आरो दावहाखौ बुंथिनानै;

खन्थाइगिरिफोरा सुजुयो थासारिनि इंखंखौ नायनानै

जीउ आरो बुब्लिखौ सं दान्नानै ।

आं चित्रलेखामोनथाय—

इउनखौ नायना खेंखा-खेंखिखौ फेंखागौमोन

गेरेमसा हारिनि आबुं जारिमिन लिरखागौमोन

मेहेरगोनां सान्थौनि बिदैबरहा खन्थाइ सुजुखागौमोन

गासै जेथोखौनो स्र-स्राय खालामखागौमोन

समनि आइराखि गराइयाव गाखोना हारिखौ दैदेनगौमोन । □

सानस्त्रि

मोननै सानस्त्रि

मोनसेया “थां आरो थांनो हो”

गुबुन मोनसेया “फै जों बर’ हारिनि थाखाय थैनि

नाथाय बर’ हारिया जोंनि थाखाय दाथैथों।”

गिदिर गिदिर हारिया फिसा हरिखौ मनगलाबदों

गावनि उदैनि थाखाय गावनो-गाव फोजोबस्त्रांलायदों;

गोहो गोराया गोहो गोलोन्दांखौ गादबदों

अन्याइया न्याइखौ सोबखदों

हिंसाया अहिंसाखौ नासयदों

बिनिखायनो गेदेमाफोरा बै मोन्थोरजों हरिखौ फोजादों।

अर्बनि सोरजिथाइ नों आरो आं सानैबो समान

नोंहा जेसेबां मोन्थाइ दं आंहाबो एसेबांनो दं

बिनिखायनो सासे गेदेमाया बुंदों—

नों जेरै थांनानै दं, गुबुनखौबो थांनानै थानो हो।

नाथाय गुबुन सासे गेदेमाया बुंदों—

रोखा रोखा नुजादों

नों जोंखौ गादबदों, सोबखदों आरो नासयदों

आंनि आइ आरो जोलैखौ आं थैनो होया

बिसोरनि थाखाय थैनायनिफ्राय आं फावसाया।

थांखिया मोनसेयानो नाथाय सानस्त्रिया मोननै

थामथि सानस्त्रियासो खालामदों बिसोरखौ फारनै

खाबुआवनो जाबाय मोखाया मानै मावजिनि सिथाव गुरनै;

सोर जाखो बै थामथि सानस्त्रिनि बिगुमायालाय ?

मंगलिय, आर्य, निग्रइड ना अष्ट्रिक फालाय ??
बर' ना हारि फिसा हारसा जाखो ???
जानोबा सांग्रांथि गैयैखाय गावनो गाव खुद्रिलायदों
बिनिखायनो मानै मावजिया मोखाजों थगायजादों।
थामथि सानस्त्रिनि आखुथाइयानो थगायनाय
बिनि मोन्थाम गाबा नासयनाय, गादबनाय, सोबखनाय;
अब्बालाय मोन्थाइ आरो थामोन्थाइनि बै सानस्त्रिया बोरैथो गोरोबनाय
बिनिखायनो सोनारगोन गावनि सायावसो इउननि थांनाय थैनाय। □

थुंग्रि

आमाइ,

नमा नआव आवथाइनाय बै थुंग्रिया

आइया बुंदों जामनाय गैया जिनाय गैया

माराम खारोड गुबुना सामलायनोबो हाया ।

आइया बुंभावदों—

आबौनि बिबौनि बिमायंनिफ्रायनो हुदाया सोलिबोदों

फिरि फिरियै दौदिनया बुंथिनाय बादि मानिबोदों

दांनो मोन्थाइ गैया नाथाय गोसोआ खें खें जादों ।

आमाइया बिखुं बिलिर बिलिर बुंदों—

बानायसो, बे नखरनिल' नड हारिनि फुंखासो

निदानखौ होखारग्रा इनायखौ संहारग्रा

सुथुर आरो खैसारनि रैखागिरिसो ।

आंबो सानो साबगौ आमाइ—

जोंहानि नखरावजे जारिमिनारि गोसोखाडारि दं

माबेबा जौथाइनि नाथाय गोरबोआव दुबगांनाय दं

लिरजायाखै बबेखानि खुगा खुगा सोलिबाय दं ।

गोर्बोआव रोमै रोमै जाखांफैदों

जेन्दोंब्लाबो देतसुड दावहायाव सुहुंमुंजों

थुंग्रि सिबनायखौ नागाराखैमोन नोलोमुणि राजखुंग्रिया आहमफोरजों

आखाइनि थुंग्रिखौ बिख'भाव सोयाखैमोन

दावहायावल' मुखुबमोन सिखना जोहोलावा बृटिशजों

बेसेबांदि दुबगांथाव सल'आ—

जेन' आंसो दावहाथिलियाव सुथुरजों ।
थुंग्रिनि धोरोमा सैथो
आरो गोथार बेनि दाहारा,
बे सैथोख्रौ संहारा
नियाइनि निस्थुर नडा
अन्याइखौबो निमाहा खालामा;
बिनिखायनो फिरियै फिरि बाहायजादों जोंनि समाजाव । □

गनै आगजु

आनि मोखाडव गनै आगजु दं

रेबगन आरो थुंग्रि;

बाश्रा फावाव बुंदों—

"Pen is mightier than sword."

थामहिनबा, लिरनाय सोदोबा राफोद-फोद

रेबगननि गेजेरजों गोर्बो इसिंखौ बेखेवनो हायो

गियाननि फुंखा आरो मोन्दांथिखौ फोरमायनो हायो

अरथाय आरो जौथाइखौ सिनायथिनो हायो

गाहाम आरो गाज्रिखौ दिन्थिनो हायो

जाखां आरो जाफुं थासारिखौ बिजिरनो हायो ।

थुंग्रिया गेजेरजों सैथो आरो असैथोखौ रोखा खालामो

खायसे बुडे—

थुंग्रिया हिंसाखौ फोजोबना गुबुन मोनसे हिंसाखौ सोमजिहोयो

सान्थिखौ फोजोबना असान्थिखौ गायसनो

नाथाय,

दुथांखौ संहारनो प्रलयनखौ लाबोदों नवानि समाव

अहंखारखौ फोजोबना सान्थि गायसनदों महाभारतनि मुगायाव

उदखारिखौ फोजोबना आब्रुथि गायसन्दों रामायण मुगायाव ।

थामहिनबा,

रेबगना बिनि नोजोराव राफोदसिन

थुंग्रियाबो बिनि बिथिडव जौगासिन । □

बरनि अख्रानि हाथरखि

यै लोगोफोर फै
थरसे हाथरखि सोरजिनि
बरनि अख्रानि हाथरखि;
बे माब्लाबाबो दोबैया
खोमसियाबो साग्लोबा
जुगामि स्रं आरो बिदुं गथायगोन ।
आयु, मा एफाग्राब समायना बर' हादोरा
अराइ मोथांखोर सोमखोर मिथिंगा,
हाजो-जौयेन फैलाव-हायेन
दैमा-दैसा दावमा-दावसा
बेसेबांदि सोमोनांथाव जौनि हालामा ।
बर' गामि गामि खाम सिफुंनि रिहाबनाय
बिमा माइनावनि खथ'थं खथ'थं गरखा खुनाय
दाव खौवौनि दालाइ बारस्ताय बारस्ताय देंखो बोनाय
बेनो नडहोनब्ला एहेम बोराइ-बुरिनि नबथि बोराय ।
फिसौफोरा हनै ज'-ज' फरायसालियाव थांदों
गोदान आरोदायारिनि मिजिं सुजुदों,
गेदेमाफोरा थुनलाइ आद्दायाव गियाननि जे लुदों
आबादारिफोरा बोथोर नाइयै नाइयै आबाद हुदों;
साबना हामना जौनि गामिया थारैनो समायप्लेदों ।
नाथाय, बोथोरा मानोबा खाबजाया खाबजाया
आयं समबारुवाबो मोखां गेवा गेवा
फाजाथि बिबाराबो गावस्त्राया गावस्त्राया

दावखा बिदै जोमैयाबो बुखारलाड बुखारलाड
सान ना हर बुंनोनो हाया हाया ।
अखाफोरासो सानखौ मन'बाय नामासै
हादोरसि बिदोरसि गोसोआसो गाबखांबायसै;
नड नड जाथारनाय नड
खोमसि खोमब्लाव दांग्रोमना मुलाम्फा गैया
गुबुननियाव सोनारना हान्थिजाया
खौसेयै आवगायनायनि अनगा राहा गैया ।
नै सनाफोर,
खोनादोंदा आनि गाबज्जिनायखौ
गोसोआवथ' दंदा आजै-आजौनि सल'खौ
हाम्फे-दुम्फेनि गाहेनजों अखां थुखोनायखौ;
फैदो-फै बयबो फै
थरसे गोदान नक्षत्र सोरजिनि
बर'नि अखांनि हाथरखि । □

सिखांदो गेदेमा

गेदेमा नॉनि गाराड्ड मानोबा थेरदों दिनै
बैसागनि अखा खोरोमनाय बादि गोख्रों रावआ
दावस्त्रि कफाथि बादि थख' थख' गनाय सोदोबा
दाव ख्रौवौ बादि मिलौहाब गाराड्ड
मानोबा जेलदेमा-मा खम्फिसोगारदों ।
नॉनि मोखाडव मॅनायनि रेखा बेरखांदों
मेगन मुसुगुराबो सिदोमा-मा जादों
गुसुथियाबो रानस्त्राव-स्त्राव गोसोम जादों
माब्लाबाबो जाफेराखै नुना बयबो सोमोहाबदों ।
नों मेंब्ला बोरै जानो गेदेमा
गोथै लावथिजों बुजा बुजा हनै गेना नांबाय हारिया
दैदेननांगोन नोंसो अमर लावथिखौ आखाइयाव दैना
दुखुनि समाव जोंनि दिथागिरि जाना ।
बुदांनि रावआव जों मानो गोजावनो
गावनो गान्दि सोबना गोरोन्थाय नांबाय
आब' थाथिखियाबो एम्फौ सुना रोमोलांबाय
मुगाखौ साखि दोनना गावनो गाव सैगार जाबाय ।
साना दोबैनोसै गेदेमा
मोखांखौ सुस्त्रांफैदो फुंखायाव
बोलो फोराफैदो सम थानायावनो
आइनि संनाय ओंखाम खब'से सोना खुगायाव
अमर लावथिजों फोजाखांफैदो गोदान फिरिखौ ददिं-दिं बुब्लियाव । □

लाइमोन बुब्लिनि गेलेनाय

गेरमेर दैसानि रुपालि गाथोनाव
आमै जिमै गेलेनाय समाव
हां थिफुं थिफुं थब्ल थब्ल
मानोबा नोंखौल' नागिरप्लाडेमोन
मानोथाय नोंबो आंजौल' बादुवा जायोमोन ।
धोरोमफुर गामिनि गेलेग्रा फोथाराव
सै गुदु गुदु गेलेनायाव
देग'-ग' बेजों बारस्ताय बैजों बारस्ताय
मानोबा नोंखौल' आवथेप्लाडेमोन
नोंबोसो मिनिबाला बाला आंजौल' दांजायोमोन ।
कोदोमगुरि गोजौ फरायसालियाव फरायनायाव
बोसोरारि खेला-दुला जानाय समाव
गोसोआ आइखां बाइखां जासोयोमोन
आं डइनाताप्ला दामाब्ला नों लोमजाप्लायोमोन
नों रोजाबाब्ला आंहाबो मुद्राया सिलिडेमोन ।
समाजान सिंगिबिलोयाव ना गुरनायाव
बेलाव अरजाब्ला आंखौ गोबाखबनायाव
आंहा हां थोनो थोनो जालायथारोमोन
नोंबो ना गुरनायाव आंखौल' लोगो लायोमोन
बेलाव दं ना गैया आंबो बेखौल' नायखायोमोन ।
गामिनि बोसोरफ्रोमबो लावखार ओंखाम जानाय समाव
आं नोंनि साखाथियाव जिरायनायाव
जोंखौ बयबो खेरा खेरा जालायथारोमोन

नोंबोसो आंनि थोरसिनि मुंबो मोनाब्ला बेरेदोमोन
 बिखुनजो जागोनखौ नुब्ला गिनायबो मोनोमोन ।
 गोलोम बोथोरनि बन्ध समाव
 नोंस्त्रानियाव नांगोलजांखा जानायाव
 मा एफाग्राब मिलौहाब बै बुब्लिया
 खाबुआवनो नोंनि खावलायाव आबिर गायोमोन
 नोंबोसो मिसिबथाबना आंखौ हेफाजाब होयोमोन ।
 गोजां बोथोरनि थियेटाराव
 गेलेरियाव जिरायना नाइनाय समाव
 नोंजों आंजों मोदोम हुब्लेनायजों
 साना गोराना गोरोबफलेलायोमोन
 नाटकखौ दाजोबथ' दाजोबथ' नंलायखायोमोन ।
 बोथोर गोदान रंजालि बैसागुआव
 सेंग्रा सिख्ला बयबो उजायखांनायाव
 बयबो सोखो मोखो जालायखायोमोन
 बोसोरफ्रोमबो खारसननो खारसननोल' बुंबाय थायोमोन
 आंबो एवखांना लांखारनो लांखारनोल' सानोमोन । □

